

2009-mi ilassutitut aningaasaliissutitut inatsisissatut siunnersuut

pillugu

Aningaasaqarnermut Ataatsimiititaliap

ISUMALIUTISSIISSUTAA

inatsisissatut siunnersuutip aappassaaneerpeqarnerani saqqummiunneqartoq

Aningaasaqarnermut Ataatsimiititaliap ilaasortai ukuupput:

Inatsisartunut ilaasortaq Naaja Nathanielsen (Inuit Ataqtigiit), siulittaasoq

Inatsisartunut ilaasortaq Niels Thomsen (Demokraatit), siulittaasup tullia

Inatsisartunut ilaasortaq Per Berthelsen (Siumut)

Inatsisartunut ilaasortaq Aqqaluaq Egede (Inuit Ataqtigiit)

Inatsisartunut ilaasortaq Finn Karlsen (Atassut)

Imarisaanut nalunaarsuut:

| | |
|---|----|
| <i>1. Aallaqqaasiut</i> | 4 |
| <i>2. Namminersornerullutik Oqartussat missingersuutaat pillugit Inatsisartut inatsisaat nr. 8, 29. oktober 1999-meersoq – missingersuusiornermut inatsit</i> | 4 |
| <i>2.1 Aningaasaleeriaatsit</i> | 5 |
| <i>2.2 Aningaasaliissuteqartarnermi tunngaviit</i> | 6 |
| <i>3. Aningaasaliissutit pillugit missingersuusiornermut inatsimmi aalajangersakkat</i> | 6 |
| <i>4. Ilassutitut aningaasaliissutinut inatsit</i> | 6 |
| <i>4.1 Aningaasaliissutit iliuitsillu oqaasertaliussatigut aalajangersakkanik tunngavillit</i> | 6 |
| <i>4.2 Ilassutitut aningaasaliissutinut inatsisissatut siunnersuummik saqqummiussineq</i> | 6 |
| <i>4.3 Sulianik Inatsisartuni suliaassanngorlugit innersuussisarnerit</i> | 7 |
| <i>4.4 Aningaasaliissutit inatsisitigut pisussaaffigisat isertitassatullu aningaasaliissutit</i> | 7 |
| <i>4.5 Aningaasaleeriaatsit allannguuteqartinneqarnerminni Aningaasaqarnermut Ataatsimiititaliamit akuersissutigineqartut</i> | 8 |
| <i>4.6 Maleruagassanik erseqqinnerusunik aalajangersaanissamut tunngavissat</i> | 8 |
| <i>4.7 Aningaasaliissutinik allannguinnissamik qinnuteqaateqarnissamut piumasaaqatit</i> | 9 |
| <i>4.8 Ilassutitut aningaasaliissutinut inatsisip imarisai</i> | 10 |
| <i>4.9 Aningaasartuutit isertitanillu nakkutilliineq</i> | 10 |
| <i>5. Naalakkersuisut 2008-imi Aningaasaqarnermut Ataatsimiititaliamut aningaasaliissuteqarnissamik qinnuteqaataat</i> | 11 |
| <i>6. 2009-mi aningaasanut inatsit aamma 2009-mi ilassutitut aningaasaliissutinut inatsisissatut siunnersuut – kisitsisit pingaarnerit aningaasaleeriaatsinullu agguataarinerit</i> | 13 |
| <i>6.1 Kisitsisit pingaarnerit aningaasanngorlugit</i> | 13 |
| <i>6.2 Ilassutitut aningaasaliissutit (inatsisissatut siunnersuummi § 1) – allannguutit oqartussaasunit assigiinnngitsunit pingasunit akuersissutigineqartut</i> | 13 |
| <i>6.2.1 Naalakkersuisut oqaasertaliussamut innersuussillutik akuersissutigisaat</i> | 14 |
| <i>6.2.2 Inatsisartut Aningaasaqarnermut Ataatsimiititaliaannit akuersissutigineqartut</i> | 14 |
| <i>6.2.3 Inatsisartut Suleriaaseq pillugu Ataatsimiititaliaannit akuersissutigineqartut</i> | 15 |
| <i>7. Oqaasertaliussanik allannguinerit (inatsisissatut siunnersuummi § 2)</i> | 15 |
| <i>8. Konto pingaarneq 20.11.50 – Ingerlatsinermut sillimmatit</i> | 15 |
| <i>9. Naalakkersuisut nuussinerinut Aningaasaqarnermut Ataatsimiititaliap oqaaseqaatai</i> | 16 |
| <i>9.1 Ataatsimut isigalugu</i> | 16 |
| <i>9.2 Aalajangersimasunut oqaaseqaatit</i> | 16 |
| <i>9.2.1 Sulisorisat pillugit paasissutissat</i> | 16 |

| | |
|--|----|
| 9.2.2 Naalakkersuisut kingumoortumik atuutilersumik nuussinissanik akuersissutiginninerat..... | 17 |
| 9.2.3 Oqaasertaliussani piginnaatitsissummik unioqqutitsineq..... | 18 |
| 9.3 Naalakkersuisut aningaasaliissutinik nuussineranni inatsisitigut tunngavissat..... | 19 |
| 10. Aningaasaqarnermut Ataatsimiititaliap inatsisissatut siunnersuummut oqaatigiuma-sai allat..... | 19 |
| 10.1 Nalinginnaasumik oqaaseqaatit..... | 19 |
| 10.1.1 Sillimaffiginnissinnaasimannginnissamik piumasaaqat..... | 20 |
| 10.2 Inatsisissatut siunnersuummi kukkunerit amigaatillu aalajangersimasut..... | 21 |
| 10.2.1 Ilanngussaq 1 aamma nalinginnaasumik nassuiaatit..... | 21 |
| 10.2.2 Ilanngussaq 2, 2009-imut oqaasertaliussanut allannguutit..... | 21 |
| 10.2.3 Missingersuutitut ilanngussat..... | 21 |
| 10.3 Aningaasaliissuteqarnissamik suliassanut ataasiakkaanut oqaaseqaatit..... | 22 |
| 10.3.1 Kontomut pingarnermut 24.01.01-imut, Akileraartarnermut Aqutsisoqarfimmi allaffissornermut tunngasumut, ilassutitut aningaasaliissutit (09-402)..... | 22 |
| 10.3.2 Puisit amiinik tunisinerup ilaannakuusumik tamakkiisumilluunniit taamaatinneqarnera (09-412)..... | 23 |
| 10.3.3 Efterkoliugallartumik Kangerlussuarmi pilersitsineq (09-416)..... | 23 |
| 10.3.4 Akileraartarneq Atugarissaarnerlu pillugit Isumalioqatigiissitaq (09-440)..... | 23 |
| 10.3.5 Nuummi GU-p allilerneqarnissaanut imm. 2-mut aamma 3-mut aningaasat atugasannagortinneqarnissaat (09-443 aamma 09-446)..... | 24 |
| 10.3.6 Narsarsuarmi mittarfimmik iluarsaassineq (09-449)..... | 25 |
| 10.3.7 Kultureqarnermut, Ilinniartitaanermit, Ilisimatusarnermut Ilageeqarnermullu Naalakkersuisoqarfimmut (KIIN) ilassutitut aningaasaliissuteqarnissamik qinnuteqaat (09-451)..... | 26 |
| 11. Aningaasaqarnermut Ataatsimiititaliap kaammattuutai..... | 26 |
| 12. Aningaasaqarnermut Ataatsimiititaliap inassuteqaatai..... | 27 |

Ilanngussat

Ilanngussaq A Aningaasaqarnermut Ataatsimiititaliap 2009-mi aalajangiiffigisai
 Naalakkersuisunit il.il. akissutinik ilallit. (Suliaq nr. 09-399 – 09-456)

1. **Aallaqqaasiut**

Inatsisartut 2009-mi ilassutitut aningaasaliissutininut inatsisissaattut siunnersuut Aningaasaqarnermut Naalackersuisumit Inatsisartut 2010-mi upernaakkut ataatsimiinneranni saqqummiunneqarpoq. Inatsisissatut siunnersuut siullermeerneqarami Aningaasaqarnermut Ataatsimiititaliamit suliarineqartussanngorlugu innersuunneqarpoq. Inatsisissatut siunnersuut Aningaasaqarnermut Ataatsimiititaliap suliaraa matumuunalu Inatsisartut inatsisissatut siunnersuummik aappassaaneerinissaannut isumaliutissiissuteqarluni.

Aningaasaliissuteqarnissamik qinnuteqaatit Naalackersuisunit ukiup siuliani tiguneqartut ilaat isumaliutissiissummi matumani Aningaasaqarnermut Ataatsimiititaliamit paasisutissiissutigineqarput. Aalajangiinerit tamakkerlugit taakkunungalu atatillugu allaqatiginnissutit isumaliutissiissummut ilanngussatut A-tut ilanngunneqarput.

Aningaasaqarnermut Ataatsimiititaliap suliaata ilaanik pingaarutilimmik taamatut sukumiisumik issuaanikkut isumaliutissiissut una Aningaasaqarnermut Ataatsimiititaliap 2009-imi ukiumoortumik nalunaarutaatut taaneqarsinnaavoq.

Kiisalu aalajangiinerit Naalackersuisunut nassiunneqarnerat ilutigalugu takuneqarsinnaasunngortinneqarnissaat Aningaasaqarnermut Ataatsimiititaliap anguniartaraa oqaatigineqassaaq. Taamaalillutik aningaasaliissuteqarnissamik suliassanut atatillugu Aningaasaqarnermut Ataatsimiititaliap ukiuni kingullerni aalajangiineri tamarmik www.inatsisartut.gl/Aningaasaqarnermut Ataatsimiititaliaq-ip ataanni nassaassaapput. Aalajangiinerit suliap normuata aammalu Aningaasaqarnermut Ataatsimiititaliap ulloq aalajangiiffigisaata kiisalu sammineqartup ataani ilanngunneqartarput. Suliaq pillugu naammaginartumik paasisutissiisimanninneq allatigulluunniit amigaatit amerlasuutigut tunngavigalugit Aningaasaqarnermut Ataatsimiititaliaq aalajangiinissaminik kinguartitsisariaqartarmat suliap normuata ataatsip ataani aalajangiinerit arlallit ilanngunneqarsinnaasarput. Taamaattumillu suliap normuata kingorna kisitsimmik allassimasoqartarpoq, tassuunakkut takutinneqartarluni suliami ataasiarluni, marloriarluni pingasoriarluniluunniit aalajangiisoqarsimasoq, soorluttaaq Aningaasaqarnermut Ataatsimiititaliap aalajangiinerata ullua nalunaarneqartartoq.

Aningaasaqarnermut Ataatsimiititaliaq ataatsimiinnissani pillugit ukiumoortumik pilersarusiortarpoq pilersaarullu taanna ataatsimiititaliap nittartagaani takuneqarsinnaavoq. Ataatsimiittarnissanut pilersaarutip Naalackersuisunit ilisimaneqarlunilu ataqqineqarnissaa ataatsimiititaliamit naatsorsuutigineqarpoq.

2. **Namminersornerullutik Oqartussat missingersuutaat pillugit Inatsisartut inatsisaat nr. 8, 29. oktober 1999-meersoq – missingersuusiornermut inatsit**

Inatsisartut 1999-imi ukiakkut ataatsimiinnerminni missingersuusiornermut inatsit akuersissutigaaat. 2000-imi upernaakkut ataatsimiinnermi inatsimmi § 10 allanngortinneqarpoq, taamaalillunilu Inatsisartut aningaasanut inatsisaat ukiup aningaasanut inatsisip atuuffiata siuliani ulloq 15. november nallertinnagu akuersissutigineqartartussaavoq.

Missingersuusiornermut inatsisikkut missingersuusiornermi tunngaviit pioreersut aalajangersakkatigut maleruagassiunneqarput erseqqissarneqarlutillu, taakkunungalu ilaavoq

Inatsisartut ukiumi aningaasanut inatsisip atuuffiani aningaasaqarnikkut tullerriaarinerata aningaasanut inatsimmi ataatsimoortumik ingerlanneqartariaqarneranik tunngavik.

- Aningaasaqarnerup naalakkersuinikkut tamakkiisumik eqqumaffigineqarsinnaanerani, aamma
- tamakkiisumik tamanut sammititamik tullerriaarisarnissamik anguniagaqarneq aallaavigalugu taama tunngaveqarneq qitiusumik inissisimavoq.

Taamaattorli aningaasaliissuteqarnissamik pisariaqartitsilerneq aningaasanut inatsisip akuersissutigineqarnerani siumut naatsorsuutigereerneqarsinnaasimangippat Naalakkersuisut qinnuteqarnerisigut nutaanik aningaasartuuteqarnissaq Aningaasaqarnermut Ataatsimiititaliamit akuerineqarsinnaavoq. Aningaasaqarnermut Ataatsimiititaliap siusinnerusukkat aningaasaliissutigisai, *ilassutitut aningaasaliissutitut* taaneqartartut, ilassutitut aningaasaliissutitut inatsisikkut aalajangersaganngortinneqartarput. Ilassutitut Tamatuma malitsigisaanik ilassutitut aningaasaliissutitut inatsit maanna tassaalerpoq kingusinnerusukkat aningaasaliissutitut inatsit, ukioq aningaasanut inatsisip atuuffia naareeraangat akuersissutigineqartartoq.

Missingersuusiornermut inatsit ulloq 1. januar 2001 atortuulerpoq, taamaattorli aalajangersakkat ilaat, soorlu sanaartugassanut iluarsagassanullu aningaasaateqarfiup pilersinneqarneranut tunngasoq aamma ilassutitut aningaasaliissuteqartarnerit pillugit aalajangersakkat ulloq 1. januar 2000 atortuulerput.

Aningaasaliissutit, aningaasaliissutitik allannguinerit aningaasaleeriaatsillu assigiinngitsut pillugit missingersuusiornermut inatsimmi aalajangersakkanik Inatsisartut (Naalakkersuisullu) eqqumaffigineqqullugit minnerunngitsumillu aningaasaliissutit Inatsisartut aalajangigaat ataqqineqaqqullugit missingersuusiornermut inatsimmi aalajangersakkat qitiusut ilaasa isumaliutissiissummut matumunnga aallarniutigalugit ilanngunneqarnissaat Aningaasaqarnermut Ataatsimiititaliamit pissutissaqarsorineqarpoq.

2.1 Aningaasaleeriaatsit

Missingersuusiornermut inatsisip imarai aningaasaleeriaatsit assigiinngitsut aalajangersakkatigut maleruagassiunneqarlutillu erseqqissarneqarnerat aamma aningaasaliissutit atorneqarnissaannut maleruagassat kiisalu aningaasaliissutit nutaat allanngukkallu assigiinngitsut aalajangersakkatigut maleruagassiunneqarnerat. *Aningaasaleeriaatsit* makkuupput:

- ingerlatsinermut aningaasaliissutit
- tapiissutitut aningaasaliissutit
- aningaasaliissutit inatsisitigut pisussaaffigisat
- sanaartornermut aningaasaliissutit, aamma
- isertitassatut aningaasaliissutit.

Missingersuusiornermut inatsisip nassataraa sanaartornermut tunngasuni sanaartugassanut iluarsagassanullu aningaasaateqarfimmik, missingersuusiornermik tunngaveqartumik pilersitsisoqarnera, tamatumalu kingunerisaanik pissutsit teknikimut tunngassuteqartut aningaasaqarnikkut sunniutaat, soorlu sanaartornerit ingerlanneqarnerisa sukkassusaasa allanngorneri aamma sanaartukkanut aningaasaliissuteqaqqinnissat pillugit apeqqutit, aningaasaliissutitut inatsisini ilanngunneqartartussaajunnaarput.

2.2 Aningaasaliissuteqartarnermi tunngaviit

Aningaasanut inatsimmi missingersuutitut ilanngussani tamani *Aningaasaliinermi tunngavigineqartut* ataanni aningaasaliinermi tunngavigineqartut erseqqinnerusumik paasissutissiissutigineqartassapput, ilaatigut:

- Aningaasaliissutit kingusinnerusukkut atugassanngortinneqarnissaat, aamma
- naatsorsuutit inaarsaanermut atatillugu aningaasaliinermi tunngavigineqartut qanoq eqquutsinneqartigisimanerannik nalilersuisinnaanissap periarfissaqarnissaa siunertaralugu.

3. Aningaasaliissutit pillugit missingersuusiornermut inatsimmi aalajangersakkat

Missingersuusiornermut inatsimmi § 1, imm. 3-mi aalajangersarneqarpoq:

Aningaasaliissuteqarnissamik sioqqutsisumik akuersissuteqartoqareertinnagu aningaasartuuteqarnanilu aningaasanik atuisoqarsinnaanngitsoq.

§ 3-mi aalajangersarneqarpoq:

Aningaasaliissuteqarneq Naalakkersuisunut ilaasortap aalajangersakkat erseqqinnerusut malillugit aningaasanik atuinissaanut piginnaatitsissutaasoq. Naalakkersuisunut ilaasortaq sukkulluunniit Naalakkersuisunut ilaasortaasoq Naalakkersuisoqarfimmut pineqartumut aningaasaliissutitut akisussaavoq.

4. Ilasutitut aningaasaliissutitut inatsit

4.1 Aningaasaliissutit iliuutsillu oqaasertaliussatigut aalajangersakkanik tunngavillit

Missingersuusiornermut inatsimmi § 25 - § 29-mi aningaasaliissutit nutaat allanngortitalluunniit pillugit aalajangersakkat malittarisassiuunneqarput, taamaalillutillu *Ilasutitut aningaasaliissutitut inatsimmi* aalajangersakkat tunngaviusut taakkunani malittarisassiuunneqarput. § 25, imm. 1-imi aalajangersarneqarpoq

„ukiup aningaasanut inatsisip atuuffiata ingerlanerani nutaanik aningaasaliissuteqarnissamut oqaasertaliussaqarnissamullu imaluunniit aningaasaliissutit oqaasertaliussanilluunniit allanngortitsinissamut piumasaqaataasoq Inatsisartut Aningaasaqarnermut Ataatsimiititaliaat Inatsisartut sinnerlugit akuersissuteqaqqaarsimassasoq.“

Aalajangersakkakut tassuuna ilaatigut erseqqissarneqarpoq aningaasartuutit aningaasanut inatsimmi tunngavissaatitaasunit allaasut Aningaasaqarnermut Ataatsimiititaliaq sioqqutsisumik akuersissuteqareersimatinnagu aningaasartuutigeqqusaanngitsut.

§ 26-mi aalajangersarneqarpoq

ukiup aningaasanut inatsisip atuuffiata ingerlanerani nutaanik aningaasaliissutigineqartut oqaasertaliunneqartullu imaluunniit aningaasaliissutit oqaasertaliussallu allanngortinneqartut aningaasaliissutigineqarnermik kingorna ilasutitut aningaasaliissutitut inatsimmut ilanngunneqartassasut.

Aammattaaq iliuutsit oqaasertaliussamik aalajangersakkatigut tunngavillit ilasutitut aningaasaliissutitut inatsimmut ilanngunneqartartussaapput.

4.2 Ilasutitut aningaasaliissutitut inatsisissatut siunnersuummik saqqummiussineq

§ 26, imm. 3-mi aalajangersarneqarpoq Naalakkersuisut ilassutitut aningaasaliissutitut inatsisissatut siunnersuut kingusinnerpaamik ukiup aningaasanut inatsisip atuuffiata kingorna Inatsisartut ileqquummik ataatsimiinnissaannut siullermut Inatsisartunut saqqummiuttassagaat. Taamaalilluni pineqartoq tassaavoq aningaasaliissutaareersunut inatsit, Suleriaaseq pillugu Ataatsimiititaliap aamma Aningaasaqarnermut Ataatsimiititaliap siusinnerusukkut aalajangigaannik aalajangersakkatigut tunngavissiisoq.

Aningaasaliissutaareersunut inatsisip pineqarnerata kingunerisaanik 2008-mi aningaasanut inatsit aamma 2008-imi ilassutitut aningaasaliissutitut inatsit katillutik aningaasaliissutit oqaasertaliussallu 2008-mi atuuttut suunerinik takussutissiisussaapput. Taamaalillutik aningaasaliissutit 2008-mi aningaasanut inatsimmi aamma 2008-mi ilassutitut aningaasaliissutitut inatsimmi ilaatinneqartut, taakkunungalu ilanngullugit sanaartugassanut tunngasuni *suliassanut aningaasaliissutit, Nunatta Karsiata 2008-mi naatsorsuutaanut aamma 2008-imi Sanaartorneq pillugu Nassuiaammut* tunngaviupput. Nunatta Karsiata naatsorsuutai Sanaartorneq pillugu Nassuiaat Inatsisartut upernaakkut ataatsimiinneranni saqqummiunneqassapput.

4.3 Sulianik Inatsisartuni suliassanngorlugit innersuussisarnerit

Sulianik Inatsisartut Aningaasaqarnermut Ataatsimiititaliaata arlaannik pissuteqarluni isummerfigisinnaangisaanik isummerfigiumannngisaanilluunniit peqarsinnaasarpoq, soorlu suliaq tunngaviulluinnartumik aallaaveqarpat, aningaasartai annertuppata imaluunniit Aningaasaqarnermut Ataatsimiititaliap Inatsisartut suliaq pillugu isumaat nalornissutigippagu. Tamatumani Aningaasaqarnermut Ataatsimiititaliap suliamik Inatsisartunut suliassanngortitsilluni innersuussisinaaneranut periarfissaqarpoq. 2008-mi sulianik Inatsisartunut innersuussisooqanngilaq.

4.4 Aningaasaliissutit inatsisitigut pisussaaffigisat isertitassatullu aningaasaliissutit

Aningaasanut inatsimmi aningaasaliissutigineqartoq inatsisitigut pisussaaffigisaq ukiup ingerlanerani siunertamut tassunga aningaasartuutaajumaartutut naatsorsuutigisanik sapinngisamik pitsaanerpaamik *missingiinermut* takussutissaasarpoq. Aningaasartuuteqarnissat immikkut inatsisiliani aalajangersarneqartarput, soorlu pensionisjarititassatut aningaasartuutissanut, aningaasanut inatsimmi aningaasaliissuteqarnerisooq aningaasaliissuteqannginnorsorluunniit apeqqutaatinnagu pensionisiaqartinneqarsinnaasunut tamanut aalajangersimasunik aningaasartaqarlutik tunniunneqartartussanut, tunngatillugu taamaattoq.

Taamaalillutik aningaasaliissutitut inatsisitigut pisussaaffigisanut tunngatillugu aningaasartuuteqarnerussutit aningaasartuutikinnerussutilluunniit ingerlaannarlutik aningaasartuutigineqarsinnaapput ilassutitullu aningaasaliissuteqaataanissaat piumasaqaataanani. Aningaasaliissutitut naleqqiullugu allannguutit ukiumi aningaasanut inatsisip atuuffiani naatsorsuutini taamaallaat takuneqarsinnaapput.

Taamaallaat aningaasaliissutitut inatsisitigut pisussaaffigisanut naleqqiullugu aningaasartuuteqarnerussutit aningaasartuutikinnerussutilluunniit ilassutitut aningaasaliissutitut inatsimmut ilanngunneqartassapput aningaasartuuteqarnerussutaasoq aningaasartuutikinnerussutaasorluunniit inatsisilianik nutaanik allanngukkanilluunniit tunngaveqaraangat aningaasaliissutigineqartorlu Aningaasaqarnermut Ataatsimiititaliamit akuersissutigineqarsimagaangat.

Aningaasanut inatsisimmi isertitassat aningaasanut inatsisissatut siunnersuutip sularineqarnerata nalaani missingerneqartut aningaasanut inatsimmi aningaasartuutissanut killigitassanik tulleriinnilersuinermit aalajangiisooqataalluinnartarput.

Taamaalilluni Namminersorlutik Oqartussat aningaasartuutaannik ukiumoortumik ataatsimut tulleriinnilersuinerup malitsigisarpaa ukiup aningaasanut inatsisip atuuffiata ingerlanerani isertitatut aningaasaliissutit nalinginnaasumik allannguuteqassanngitsut. Allannguuteqartoqarsimassappat taakku aningaasartuutit inatsisitigut pisussaaffigisat assigalugit Nunatta Karsiata naatsorsuutaanut ilanngunneqartartussaapput.

Tamanna ima paasineqassaaq:

- Naalakkersuisut isertitatut aningaasaliissutit aningaasanut inatsimmi isertitassatut missingersuusiukkanut naleqqiullutik allanngorarneri malinnaaffigisassagaat
- Naalakkersuisut aningaasaliissutit inatsisitigut pisussaaffigisat aningaasanut inatsimmi tunngavissaatinneqartunut naleqqiullutik allanngorarneri malinnaaffigisassagaat
- taakku allannguuteqartinneqarnissaat ukiup aningaasanut inatsisip atuuffiata nalaani qinnuteqaatigineqassanngitsaq, kisiannili Naalakkersuisut taamaattoqarnera soorunami eqqumaffigisassagaat aammalu tamanna qissimigaarlugu ataatsimoortumik aningaasati-gut aqutsinertik aaqqissuuttassagaat
- taamaallaat aningaasaliissutit taakku inatsisitigut allannguutininik aalajangersimasunik tunngaveqaraangata aningaasaliissutit taakku ilassutitut aningaasaliissutinut inatsimmut ilanngussat aqutugalugit aalajangersakkatigut allanngortinneqarnissaat qinnuteqaatigi-neqartartussaavoq.

4.5 Aningaasaleeriaatsit allannguuteqartinneqarnerminni Aningaasaqarnermut Ataatsimiititaliamit akuersissutigineqartut

Immikkoortup 4.4-p malitsigisaanik Aningaasaqarnermut Ataatsimiititaliap aningaasaleeriaatsit uku allanngortinneqarnissaat nalinginnaasumik suliarisarpaa:

- *Ingerlatsinermit aningaasaliissutit*
- *tapiissutitut aningaasaliissutit, aamma*
- *sanaartornermit aningaasaliissutit.*

4.6 Maleruagassanik erseqqinnerusunik aalajangersaanissamut tunngavissat

Aningaasaqarnermut Naalakkersuisoq maleruagassanik erseqqinnerusunik Missingersuusiornermut Malittarisassani aalajangersaasassasoq missingersuusiornermut inatsimmi § 20-imi 33-imilu ilaatigut allassimavoq.

Missingersuusiornermut Malittarisassaq atuuttoq taamani Aningaasaqarnermut Nunanullu Allanut Naalakkersuisuusumit 17. juni 2008-mi nassiuqqarpoq. Missingersuusiornermut Malittarisassaq kaajallaasitatut atuuppoq, taamaalillunilu ingerlatsivimmit saneqqunneqarsinnaanani. Aningaasaliissuteqarnissamik suliasamik suliarinninnermit atatillugu malittarisassani aalajangersakkanik saneqqutsinissaq pillugu aalajangersimasumik tunngavilersorluakkamillu Aningaasanut Naalakkersuisoq immikkut akuersissutiginnissimappat, tamanna aningaasaliissuteqarnissamik Aningaasaqarnermut Ataatsimiititaliamut qinnuteqaammi immikkut allaqqassaaq. Missingersuusiornermut malittarisassanik saneqqutsineq immikkullu akuersissuteqarneq pillugu 2008-mi ilassutitut aningaasaliissutinut inatsimmut Aningaasaqarnermut Ataatsimiititaliap isumaliutissiisutaani immikkoortoq 10.3.5 innersuussutigineqarpoq.

4.7 Aningaasaliissutinik allannguinnissamik qinnuteqaateqarnissamut piunasaqaatit

Missingersuusiornermut inatsimmi § 28, imm. 2-mi aalajangersarneqarpoq nutaanik aningaasaliissuteqartoqarnissaanik aningaasaliissutinilluunniit allangortitsisoqarnissaanik qinnuteqaatit taamaallaat tassaassasut

- *pingaarutillit*, aamma
- aningaasanut inatsisissap suliarinerani *sillimaffigereerneqarsinnaasimannngitsunut* tunngasut.

Aalajangersagaq ima paasineqassaaq aningaasaliissuteqartoqarnissaanik tassanngaannartumik pisariaqartitsisoqalersimassasoq, tamannalu peqatigitillugu arlaatigut pingaaruteqartuussasoq. Aningaasaliissuteqartoqarnissaanik pisariaqartitsinerit aningaasanut inatsisissap suliarineqarnerani puiguisimanernik taamaaqataanilluunniit tunngaveqartut imaluunniit nutaanik aningaasaliissuteqartoqarnissaanik kissaateqarnerit ukiup tulliani aningaasanut inatsisissamut utaqqinneqarsinnaasut ukiup aningaasanut inatsisip atuuffiata ingerlanerani Aningaasaqarnermut Ataatsimiititaliamut qinnuteqarnissamut tunngaviginiarneqarsinnaanngisaannarput.

§ 28, imm. 3-mi aalajangersarneqarpoq nutaanik aningaasaliissuteqartoqarnissaanik aningaasaliissutinilluunniit allangortitsisoqarnissaanik qinnuteqaatit taamaallaat aningaasaqarnikkut iliuusissanut ukiup aningaasanut inatsisip atuuffiata ingerlanerani aningaasartuuteqarnikkut sunnuteqartussanut tunngasuussasut. Taamaalluni Inatsisartut Aningaasaqarnermut Ataatsimiititaliaata ukiup aningaasanut inatsisip atuuffiata ingerlanerani kinguneqaataasussat kisiisa isummerfigisinnaavai, ukiunilu tullerni kinguneqaataajunnartut aningaasanut inatsisissami tullermi ilanngunneqartussaapput.

Kiisalu § 28, imm. 4-mi aalajangersarneqarpoq nutaanik aningaasaliissuteqartoqarnissaanik aningaasaliissutinilluunniit allangortitsisoqarnissaanik qinnuteqaatit paasissutissanik attuumasuteqartunik tamanik imaqartassasut, taakkunungalu ilaassallutik qinnuteqaatip aningaasaqarnikkut toqqaannartumik toqqaannangitsumilluunniit kingunerisassai pillugit paasissutissat tamakkiisut.

Ulluinnarni periusiusartut naapertorlugit Aningaasaqarnermut Naalakkersuisoq Naalakkersuisut sinnerlugit aningaasaliissutit allangortinneqarnissaannik qinnuteqaammik Aningaasaqarnermut Ataatsimiititaliamut nassiussisarpoq. Pappialat atortussat nassiunneqartut kontonut pingaarnernut, aningaasaliissutinik allangortitsiffiginiarlugit qinnuteqaatigineqartunut, missingersuutinut ilanngussanik imaqartussaapput.

Pisuni arlalinni missingersuutinut ilanngussat nassiunneqartut naatsuarakasiusarsimapput suliarlu pillugu illersorneqarsinnaasumik naliliinissamut periarfissaqartitsinatik. Aningaasaqarnermut Ataatsimiititaliap pappialat Naalakkersuisut namminneq najoqqaataasa *Naalakkersuisut isummer-nissaannut tunngavissiat* nuutinneri tigugajuttarmagit missingersuutinut ilanngussap ilusiligaanera ataatsimiititaliap suliamik suliarinninneranut aalajangiisuusumik pingaaruteqarneq ajorpoq.

Missingersuutinulli ilanngussat allagaatini kisiartaallutik aningaasaliissutinik allannguinnermut tunuliaqutaasumut nassuiaatitut ilassutitut aningaasaliissutinut inatsimmi ilanngunneqartarmata Aningaasaqarnermut Ataatsimiititaliap missingersuutinut ilanngussat kisimiillutik atuarneqarsinnaanngorlutik ilusilerneqartarnissaat annertuumik pingaartippaa. Missingersuutinut ilanngussat Inatsisartunut ilaasortanit kikkunnillu tamanit Naalakkersuisut isummernissaannut tunngavissianik immikkuualuttunilluunniit allanik tapertaqartinneqaratik atuarneqarsinnaasariaqarput.

Paasissutissat makku missingersuutininut ilanngussami ilaatinneqartussaapput::

- Aningaasaliissutit suuneri
- aningaasaliissutit allannguutissaattut qinnuteqaatigineqartoq kr.-inngorlugu (1.000 kr.-ikkaartunut akunnaallillugu),
- allannguutissat qinnuteqaatigineqartup kingorna ukiup aningaasanut inatsisip atuuffiata ingerlanerani aningaasaliissutit amerlassuseriligassaat pillugit paasissutissiissutit,
- allannguutissat qinnuteqaatigineqartup nassuiarnera tunngavilersuutitaalu,
- sulisoqarnermut tunngasut allannguuteqarnissaat naatsorsuutigineqarpat tamanna paasissutissiissutigineqassaaq,
- ukiunut missingersuusiortinnut kinguneqassappat tamanna paasissutissiissutigineqassaaq,
- ingerlatsinermit sanaartukkanullu aningaasatigut toqqaannartumik aamma/imaluunniit toqqaannangitsumik kinguneqassappat tamanna paasissutissiissutigineqassaaq
- suliassami kisitsisit allannguuteqarsimappata paasissutissiissutigineqassaaq.

Taamaalilluni *allannguutissat qinnuteqaatigineqartup nassuiarnerata tunngavilersuutitaatalu* suliap nalilersuiffiginissaanut naammattumik sukumiissuseqarnissaat pingaaruteqarpoq. Erseqqissarneqassaaq *allannguutip* aningaasanut inatsimmi tunngavissaatitaasunut naleqqiullugu qanoq ittuunera pingarnerpaatinneqassasoq.

4.8 Ilassutit aningaasaliissutininut inatsisip imarisai

Ilassutit aningaasaliissutininut inatsisip imarisarparaa inatsisip ileqqussat naapertorlugit oqaasertaa, ukununga tunngasunik nalinginnaasumik marlunnik paragafeqartartoq:

- *aningaasaliissutit* allannguutaat, aamma
- *aningaasanut inatsimmi oqaasertaliussat* allannguutaat.

Ilassutit aningaasaliissutininut inatsimmiittarpoq *Aningaasaliissutininut takussutissiaq*, ilanngussaq 1, kontonut pingaarnernut allannguuteqartunut tunngatillugu aningaasanut inatsimmi aningaasaliissutinik, ilassutit aningaasaliissutinik aamma aningaasaliissutinik tamarmiusunik ilaatigut takussutissiisoq.

Taakku saniatigut ilassutit aningaasaliissutininut inatsisip imarai *inatsisip oqaasertaanut nassuiaatit*. Nassuiaatit imaraat

- *missingersuutininut ilanngussat*, ilassutit aningaasaliissutininut ataasiakkaanut tunngatillugu missingersuusiortnermi tunngavilersuutinik imallit, kiisalu
- *oqaasertaliussanut nassuiaatit*.

Taakku saniatigut ilassutit aningaasaliissutit aningaasaleeriaatsinut agguataarnerinut takussutissiaq Naalakkersuisut 2009-mi ilassutit aningaasaliissutininut inatsisissatut siunnersuutaanni ilanngunneqarsimavoq.

4.9 Aningaasartuutinik isertitanillu nakkutilliineq

Missingersuusiortnermut inatsimmi kapitali 7-imi aalajangersakkat naapertorlugit Naalakkersuisut Inatsisartut ukiup aningaasanut inatsisip atuuffiata ingerlanerani aningaasaqarnikkut tamakkiisumik tulleriinnilersuinerata eqquutsinneqarnissaa qulakkeerniarlugu aningaasartuutinik isertitanillu ingerlaavartumik nakkutilliinissartik pisussaaffigaat. Taamatutaaq Naalakkersuisut

Namminersorlutik Oqartussat aningaasartuutaasa isertitaasalu nikerarneri pillugit paasisutissanik pissarsiniartarneq ingerlatitseqqittarnerlu pisussaaffigaat, taakkununga ilanngullugit aningaasanut inatsisip tunngavilersuutitai.

Aalajangersakkat taakku malillugit aningaasaqarnikkut ingerlatsineq pillugu nalunaarut aammalu missingersuutit pillugit ilisimatitsissutit Inatsisartunut Aningaasaqarnermullu Ataatsimiititaliamut saqqummiunneqartarput.

Missingersuutit pillugit inatsit naapertorlugu missingersuutit pillugit ilisimatitsissummik ataatsimik ukiumoortumik saqqummiussinissaq Naalakkersuisut taamaallaat pisussaaffigaat. Tassani augustip naanerani missingersuutitut kisitsisit tunngaviugajuttarsimapput. 2005-imili taamani Aningaasaqarnermut Ataatsimiititaliaasup Naalakkersuisuusullu isumaqatigiissutigaaat aprilip naanerani missingersuutitut ilisimatitsissut ilanngullugu Naalakkersuisut siunissami suliarisalissagaat.

Missingersuutilli pillugit ilisimatitsissut kingulleq Aningaasaqarnermut Ataatsimiititaliamut nassiuunneqartoq oktober 2008-meersuuvoq. Ataatsimiititaliap paasisai malillugit missingersuutit pillugit ilisimatitsissutit suliarineqartarnerat Aningaasaqarnermut Naalakkersuisoqarfimmi sulisussaaleqileriasaarnermik pissuteqartumik taamaatinneqartariaqarallarsimavoq.

Nunattali karsiata aningaasaqarnikkut imaannaanngitsumik inissisimanagera eqqarsaatigalugu Namminersorlutik Oqartussat aningaasartuutaasa isertitaasalu ineriartornerat pillugu Inatsisartut akuttunngitsumik ilisimatinneqanngittuarnerat attanneqarsinnaanngilaq. Taamaattumillu missingersuutit pillugit ilisimatitsissutit ukiumut marloriarluni nassiussisarneq Aningaasaqarnermut Naalakkersuisoqarfimmit **piaartumik** ingerlateqqinneqassasoq Aningaasaqarnermut Ataatsimiititaliamit naatsorsuutigineqarpoq.

5. Naalakkersuisut 2008-imi Aningaasaqarnermut Ataatsimiititaliamut aningaasaliissuteqarnissamik qinnuteqaataat

Nutaatut aningaasaliissuteqarnissamik aningaasaliissutinilluunniit allanngortitsinissamik, oqaasertaliussassatut siunnersuutitut kiisalu immikkut ittumik atugassiissuteqarnissamik Naalakkersuisut qinnuteqaatitut saqqummiussa 58-it Aningaasaqarnermut Ataatsimiititaliamit 2009-imi suliarineqarput. 2009-mi ukiunilu siuliini suliat amerlassusiat takussutissiami ataaniittumi takuneqarsinnaavoq.

| Ukioq | Suliat amerlassusiat |
|--------------|-----------------------------|
| 2001 | 66 |
| 2002 | 48 |
| 2003 | 57 |
| 2004 | 82 |

| | |
|------|----|
| 2005 | 69 |
| 2006 | 56 |
| 2007 | 84 |
| 2008 | 93 |
| 2009 | 58 |

Suliassat aalajangiiffigisassat 58-it pineqartut Aningaasaqarnermut Naalakkersuisumit tiguneqarnermik kinguninngua Aningaasaqarnermut Ataatsimiititaliamit nalinginnaasumik suliarineqartarsimapput. Pisulli ilaanni suliassaq Naalakkersuisunit suliarineqarsimasoq sapaatit akunneri (qaammatilluunniit) arlallit qaangiutereeraangata aatsaat Aningaasaqarnermut Ataatsimiititaliamut nassiunneqartartoq Aningaasaqarnermut Ataatsimiititaliamit maluginiarneqarpoq. Tamanna naapertuutinngitsoq ataatsimiititaliap ukiut ingerlaneranni arlaleriaqaluni tikkuartarsimavaa.¹

Suliassanit 58-init taaneqartunit 28-it (48 %-ingajaat nalingi) piffissami 1. septemberimit 2009-mi decemberip naanissaata tungaanut Naalakkersuisunit suliarineqarsimasut Aningaasaqarnermut Ataatsimiititaliap paasissutissiissutigisinnaavaa.

2004-mi september - decemberimi suliassanit 82-init 44-t suliarineqarsimapput, tassa 54 %-it nalingi.

2005-mi september - decemberimi suliassanit 69-init 35-t suliarineqarsimapput, tassa 51 %-it nalingi.

2006-mi september - decemberimi suliassanit 56-init 30-it suliarineqarsimapput, tassa 54 %-it nalingi.

2007-mi september - decemberimi suliassanit 84-init 31-it suliarineqarsimapput, tassa 37 %-it nalingi.

2008-mi september - decemberimi suliassanit 93-init 28-it suliarineqarsimapput, tassa 30 %-it nalingi.

Ukiup taamaalereernerani qinnuteqartoqartillugu aningaasat atorneqareerneranni aningaasaliissuteqarnissaq pineqartoq aarleqqutigineqarsinnaavoq. Taamaattumik ajornartorsiut taanna Naalakkersuisunit suli eqqumaffigineqartariaqarpoq, missingersuusiormummi inatsit unioqqutillugu aningaasat atorneqareersut aningaasaliissutinik akuersissuteqarnissaq Aningaasaqarnermut Ataatsimiititaliamit kissaatigineqanngimmat.

Aalajangiiffigisassatut siuliassat pineqartut 58-it Aningaasaqarnermut Ataatsimiititaliamit ima amerlatigisoriarluni suliarineqarput:

Suliassat 54-it ataasiarluni suliarineqarput

Suliassat sisamat marloriarluni suliarineqarput.

Taamaalillutik Aningaasaqarnermut Ataatsimiititaliap aalajangiineratigut Naalakkersuisulluunniit suliassamik tunuartitsinerisigut suliat tamarmik naammassillugit suliarineqarput. Sulialli 09-412-ip suliarinissaa ataatsimiititaliamit itigartilluinnarneqarsimavoq, tassa Inatsisartunut qinersinissap

¹ Ajornartorsiut taanna Naalakkersuisut ataatsimiitarneri pillugit kaajallaasitami nutaami manna tikillugu kaajallaasitaasumut 20. december 2005-imeersumut taartissami aalajangersaavigineqassasoq naatsorsuutigineqarpoq. Kaajallaasitaq nutaaq naammassiniariapat nassiunneqaqullugu Aningaasaqarnermut Ataatsimiititaliap siusinnerusukkut qinnutigaa.

nalunaarutigineqarnerata kingorna imarisaa naak naalackersuinermit tunngagaluartoq nassiunneqarmat.

Suliami 09-452-imi Naalackersuisut qinnuteqaataat Aningaasaqarnermit Ataatsimiititaliamit itigartinneqarpoq. Suliat naammassineqartut sinnerini tamani Naalackersuisut inassuteqaataat Aningaasaqarnermit Ataatsimiititaliamit akuerineqarsimapput.

Suliani arlalinni Naalackersuisut ilassutitut aningaasaliissuteqarnissamik qinnuteqaataannik ataatsimiititaliap akuersinera suliat suussusiinik pissuteqartumik missingersuutitut ilanngussatigut² takussutissaqartinneqartanngikkaluartoq, sulianut 2009-mi Inatsisartut Aningaasaqarnermit Ataatsimiititaliaannit akuerineqartunut missingersuutitut ilanngussat pisariaqartut 2009-mut ilassutitut aningaasaliissutitut inatsisissatut siunnersuummut ilanngunneqarsimasut Aningaasaqarnermit Ataatsimiititaliamit oqaatigineqassaaq.

Kiisalu missingersuutitut ilanngussat arlallit kukkuneqarlutillu amigaateqartut ataatsimiititaliap paasimmagu Aningaasaqarnermit Ataatsimiititaliap oqaatigissavaa. Tamanna isumaliutissiisummi kingusinnerusukkut sammineqassaaq.

6. 2009-mi aningaasanut inatsit aamma 2009-mi ilassutitut aningaasaliissutitut inatsisissatut siunnersuut – kisitsisit pingaarnertit aningaasaleeriaatsinullu agguataarinerit

6.1 Kisitsisit pingaarnertit aningaasanngorlugit

2009-mi aningaasanut inatsimmi aamma 2009-mi ilassutitut aningaasaliissutitut inatsisissatut siunnersuummi kisitsisit pingaarnertit aningaasanngorlugit takussutissiarineqarnerat 2009-mi ilassutitut aningaasaliissutitut inatsisissatut Naalackersuisut siunnersuutaata danskisuuani quppernemi 48 – 50-imi kalaallisuuani quppernemi 55 – 57-imi takuneqarsinnaapput, taakkulu innersuussutigineqarput.

Oqaatigineqassarli aningaasaliissutitut allannguutit ilanngaattissat ilanngaatigereerlugit 694,275 mio. kr.-inik aningaasartuuteqarnermik nalillit Aningaasaqarnermit Ataatsimiititaliamit 2009-mi akuerineqarmata. Tamatuma kingorna 2008-mi IST-kkut angusat **1.004.917** mio. kr.-inik **amigartoorfiussatut** missingerneqarput. Matumani eqqaamasariaqarpoq *angusassatut missingersuutit* inaarutaasumillu *naatsorsuutitigut angusat* assignngimmata. 2009-mi inaarutaasumik naatsorsuutitigut angusat 2009-mi Nunatta Karsiata naatsorsuutaanni, Inatsisartut upernaakkut ataatsimiinneranni saqqummiunneqarlutillu siullermeerneqartussatut naatsorsuutigineqartumi takuneqarsinnaapput.

6.2 Ilassutitut aningaasaliissutit (inatsisissatut siunnersuummi § 1) – allannguutit oqartussaasunit assignngitsunit pingasunit akuersissutigineqartut

Inatsisissatut siunnersuummi ilaapput ilassutitut aningaasaliissutit ukuninnga akuersissutigineqartut

- Naalackersuisunit, oqaasertaliussanik innersuussinikkut
- Inatsisartut Aningaasaqarnermit Ataatsimiititaliaannit
- Inatsisartunut/Inatsisartut Suleriaaseq pillugu Ataatsimiititaliaannit

Aningaasaliissutit allannguutaat aalajangersimasut *Aningaasaliissutitut takussutissiami, ilanngusaaq 1-imi*, takuneqarsinnaapput. Allannguutit ataasiakkaat *missingersuutitut ilanngus-*

² Soorlu taamaappoq suliani isumaqatigiissuteqarnissamut pigisamilluunniit soorlu illuutimik tunisinissamut Naalackersuisunut ilaasortaqaq ataatsimiititaliamit piginnaatinneqarsimatillugu.

sartaqarput, taakkunanilu allannguutit erseqqinnerusumik nassuiarneqarput. *Ilanngussaq 1-imi* taamatullu *missingersuutitut ilanngussani* takuneqarsinnaassaaq Aningaasaqarnermut Ataatsimiititaliaq Naalakkersuisulluunniit aningaasaliissutinik allannguisoqarnissaanik qanga akuersisimanersut suliarlu sorleq pineqarnersoq.

6.2.1 Naalakkersuisut oqaasertaliussamut innersuussillutik akuersissutigisaat

Oqaasertaliussat tunngavigalugit aningaasaliissutinik nuussinerit amerlasuut Naalakkersuisunit akuersissutigineqarput. Nuussinerit takku ilanngaattissat ilanngaatigereerlugit missingersuutitut sunniuteqanngillat³. Ingerlatsinerimut tunngasuni nuussinerit amerlanerpaartaat suliaasaqarfiit allanngornerinik pissuteqarput.

Naalakkersuisut aalajangiineranni tunngavissaatitaasut eqquutsinneqarsimanersut Aningaasaqarnermut Ataatsimiititaliap erseqqinnerusumik naliliiffigisimavaa. Isumaliutissiissutip immikkoortuani 9.3-mi allassimasut innersuussutigineqarput.

6.2.2 Inatsisartut Aningaasaqarnermut Ataatsimiititaliaannit akuersissutigineqartut

Ingerlatsinerimut aningaasaliissutit

Ingerlatsinerimut aningaasaliissutinik allannguinerit ilanngaattissat ilanngaatigereerlugit 99,6 mio. kr.-inik nalillit Aningaasaqarnermut Ataatsimiititaliamit akuersissutigineqarput.

Tapiissutitut aningaasaliissutit

Tapiissutitut aningaasaliissutinik allannguinerit ilanngaattissat ilanngaatigereerlugit 590,9 mio. kr.-inik nalillit Aningaasaqarnermut Ataatsimiititaliamit akuersissutigineqarput.

Aningaasaliissutit inatsisitigut pisussaaffigisat

Ineqarnermut tapiissutitut aningaasaliissutit allanngortinneqarnerat tunngavigalugu aningaasaliissutinik inatsisitigut pisussaaffigisanik allannguinerit ilanngaattissat ilanngaatigereerlugit -26,0 mio. kr.-inik nalillit Aningaasaqarnermut Ataatsimiititaliamit akuersissutigineqarput. Tamatuma saniatigut aningaasaliissutinik inatsisitigut pisussaaffigisanik allannguissamik akuersissuteqartoqanngilaq, tamannalu missingersuusiornermut inatsimmi § 27-imut naapertuuppoq.

Isertitassatut aningaasaliissutit

Isertitassatut aningaasaliissutinik allannguissamik Aningaasaqarnermut Ataatsimiititaliaq 2009-mi 29,8 mio. kr.-inik akuersissuteqarsimavoq. Isertitassatut aningaasaliissutinik allannguisoqartillugu aningaasanut inatsimmi aningaasartuutissatut atugassiissutigineqartut Inatsisartut ataatsimoortumik pingaarnersuinerannik ersiutaanissaat aalajangiusimaneqartuartariaqarpoq, tak. missingersuusiornermut inatsimmi § 5.

Sanaartugassanut aningaasaliissutit

Sanaartugassanut aningaasaliissutinik allannguissamik qinnuteqaatit ilanngaattissat ilanngaatigereerlugit aningaasatigut sunniuteqanngitsut (0-iusut) Aningaasaqarnermut Ataatsimiititaliamit akuersissutigineqarput. Tamatumunnga pissutaavoq killiliussat

³ Taamaalillunilu Naalakkersuisut nuussineratigut ilanngaattissat ilanngaatigereerlugit missingersuutitut 22,928 mio. kr.-inik nalilinnik ajorseriarsimanerannik inatsisissatut siunnersuummi aningaasaliissutinut takussutissiimi (ilanngussaq 1) allaqqammat kukkuneruvoq. Isumaliutissiissuummi immikkoortoq 10.2.3-p ataani konto pingarneq 32.10.06, Peqqissaanermik Ilinniarfik pillugu allassimasut innersuussutigineqarput.

ataatsimoortumillu immikkoortitat kiisalu missingersuutitut sunniuteqanngitsumik nuussinissat kisimik akuerineqarsimanerat.

6.2.3 Inatsisartut Suleriaaseq pillugu Ataatsimiititaliaannit akuersissutigineqartut

Aningaasaliissutinik allannguinerit ilanngaattissat ilanngaatigereerlugit katillugit 0-iusut (aningaasatigut sunniuteqanngitsut) Suleriaaseq pillugu Ataatsimiititaliamit akuersissutigineqartut.

7. Oqaasertaliussanik allannguinerit (inatsisissatut siunnersuummi § 2)

Oqaasertaliussat arlalissuit inatsisissatut siunnersuummi ilanngunneqarsimapput. 2009-mi aningaasanut inatsimmi oqaasertaliussat taakku taamaaqqaat oqaasertaliussanik akuersissutigineqartunit taarserneqarput/ilassuserneqarput. Ukiunut siuliinut sanilliullugu oqaasertaliussat taama amerlanerutiginerannut minnerunngitsumik pissutaavoq qinersinerup aammalu 2009-mi junimi nutaanik Naalackersuisunngortitsinerup kingorna suliaaqaarfimmi allanngortiterineq.

Oqaasertaliussanut nassuiaatit tamakkiisuunnginnerat Aningaasaqarnermut Ataatsimiititaliap ukiut siuliini tikkuavigereerpa. Tamanna tunngavigalugu oqaasertaliussanut nassuiaatit ataatsimut isigalugu paasissutissiinerulersimanerat ataatsimiititaliamit nuannaarutigineqarmat oqaatigineqassaaq.

Oqaasertaliussalli allanngortinneqarnissaannik qinnuteqarnissaq *sooq* pisariaqarnersoq pillugu paasissutissat ersarissut nassuiaatini saqqummiunneqartariaqarnerat erseqqissassallugu ataatsimiititaliap ukiut siuliinisulli pisariaqarsora. Pisut amerlanerpaartaanni paasissutissat taakku amigaataapput.

8. Konto pingaarneq 20.11.50 – Ingerlatsinermit sillimmatit

200-mut aningaasanut inatsit ingerlatsinermit sillimmatinik 20,0 mio. kr.-inik ilaqartillugu akuersissutigineqarpoq. Ingerlatsinermit sillimmatit tigusiffigineqarnissaat/ilaneqarnissaat 2009-mi sisamariarluni akuersissutigineqarsimavoq, tamatumalu kingorna 31. december 2009-mi 10,3 mio. kr.-it sinnerussimallutik. Taamaalillutillu ingerlatsinermit sillimmatit ilanngaaseereerluni 9,7 mio. kr.-inik 2009-imi tigusiffigineqarsimapput.

Assersuutitut taaneqarsinnaavoq 2008-mut aningaasanut inatsit 44,6 mio. kr.-inik ingerlatsinermit sillimmatitaqartillugu akuersissutigineqarmat. Ingerlatsinermit sillimmatit tigusiffigineqarnissaat/ilaneqarnissaat 2008-mi aqqanileriarluni akuersissutigineqarsimavoq, tamatumalu kingorna kontomi 31. december 2008-mi 0,8 mio. kr.-it sinnerussimallutik.

Ilassutitut aningaasaliissuteqarnissamik qinnuteqartoqarneratigut ulloq 29. juni 2009-mi ingerlatsinermit sillimmatit saniatigut 20 mio. kr.-it illoqarfinni nunaqarfinnilu aalajangersimasuni immikkut suliniutissanut sillimmatissatut immikkoortinneqarput. Aningaasat atugassanngortinneqanngillat, kontomilli pingaarnermit toqqaannartumik atorneqarlutik. 31. december 2009-mi 8,2 mio. kr.-it kontomi pingaarnermi sinnerussimapput, tamatumalu kingorna oqaasertaliussami piginnaatitsissut naapertorlugu 2010-mut nuunneqarlutik.

Aningaasat qanoq amerlatigisut pineqartut eqqarsaatigigaanni sillimmatinut kontonit aningaasalersugaasunik suliniutinik nutaanik piviusunngortitsineq aallartitsinerlu missingersuusiormut inatsimmi § 5, ukiumi aningaasanut inatsiseqarfiusumi Inatsisartut

aningaasaqarnermik ataatsimoortumik tullerriaarinerannik aningaasanut inatsisip ersersitsisuunissaanik aalajangersaasoq, naapertorlugu pissasoq Naalakkersuisunut taamatullu Inatsisartunut ilaasortanut eqqaasitsissutigeqqissallugu pisariaqarsorinarpoq.

Tamatuma saniatigut Namminersorlutik Oqartussat aqutsivianni piviusorsioortumik missingersuusiortarnissamut missingersuutinillu malitseqartitsisarnissamut kajumilersitsinissaq pisariaqartoq qulakkeerneqarsinnaaqullugu sillimatitit aningaasaliussat aallaavittut isigalugu sapinngisamik killeqartinneqarlutillu siunertamut aalajangersimasumut immikkoortinneqartariaqarnerat siornatulli Aningaasaqarnermut Ataatsimiititaliamit oqaatigineqassaaq.

9. Naalakkersuisut nuussinernut Aningaasaqarnermut Ataatsimiititaliap oqaaseqaatai

9.1 Ataatsimut isigalugu

Aningaasanut inatsimmi oqaasertaliussat aammalu oqaasertaliussat, Aningaasaqarnermut Ataatsimiititaliamit kingusinnerusukkut akuersissutigineqartut 2009-milu ilassutitit aningaasaliissutinut inatsimmi ilanngunneqartut naapertorlugit kontot pingaernerit assigiinngitsut kiisalu sanaartorerup iluani suliassat akornanni nuussinissanut Naalakkersuisut piginnaatinneqarput.

Nuussinissat akuersissutigineqarsimatillugit aningaasaliissutinik allanngortitsinerit pinerit tamaasa aningaasaliissutinut takussutissiap, ilanngussaq 1-ip, immikkoortortaani (kolonne) ilanngunneqartarput. Missingersuutinut ilanngussani nuussinernut tunngavilersuutit aammalu Naalakkersuisut ulloq akuersissutiginniffiat allassimassapput. Kiisalu oqaasertaliussat, nuussinissamut tunngaviliisuusut pillugit paasissutissat nalunaarneqassapput.

Missingersuutinut ilanngussat taakku Aningaasaqarnermut Ataatsimiititaliap misissorpai, tamannalu tunngavigalugu missingersuutinut ilanngussat paasissutissiilluartuunissaasa qulakkeerneqarnissaanik pingaartitsinerminnik ingerlatsiinnarnissaannik Naalakkersuisut kaammattorlugit. Taamaattorli paasissutissat imarisartagaat ukiuni kingullerni annertusiartorsimasut oqaatigineqartariaqarpoq.

9.2 Aalajangersimasunut oqaaseqaatit

9.2.1 Sulisorisat pillugit paasissutissat

Missingersuutinut ilanngussani arlalinni allannguutissatut akuersissutigineqartut *Sulisorisassatut naatsorsuutigisat*-nut kinguneqaatissaat pillugit paasissutissat tutsuiginartut aamma ukioq manna amigaataaqqipput. Pisut ilaanni paasissutissat taakku amigaataalluinnarput, ilaannilu *sulisorisatigut allannguutit pinnagit* atorfiit allannguutaat aalajangersimasut nalinginnaasumik paasissutissiissutigineqartarsimallutik.

Missingersuusiornernut malittarisassami 2008-meersumi immikkoortoq 5.2 Aningaasaqarnermut Ataatsimiititaliamit aamma innersuussutigineqassaaq, tassani sulisorisassatut naatsorsuutigisat taakkulu naatsorsorneqartarnerat pillugit paasissutissiissuteqarnissamut Naalakkersuisut najoqqutassanik pitsaalluinnartunik aalajangersaasimapput.

Sulisorisassatut naatsorsuutigisat pillugit paasissutissat eqqortuugaluarpata 2009-mi aningaasanut inatsimmi takussutissiast *sulisorisassatut naatsorsuutigisat* pillugit paasissutissanik imallit

nutarterneqarsinnaassagaluarput. Taamaaliornikkut 2009-mi naatsorsuutininik tunniussinermut atatillugu *Sulisorisassatut naatsorsuutigisat sulisorisatut atorneqarpiartunut* sanilliunneqarnissaat periarfissaqalissagaluarpoq.

Suliffiit aalajangersimasumik amerlassusilikkat pineqannginnerat erseqqissarneqarsinnaaqqullugu aningaasaliissutinut inatsisissani aggersuni sulisorisassatut naatsorsuutigisat pillugit takussutissiani ukioq naallugu sulisorisat atorneqartalernissaat ataatsimiititaliap ukioq manna aammaarluni **siunnersuutigissavaa**. Taamaaliornikkut kukkuneq taanna ajoraluartumik nalinginnaaqisoq killilersimaarneqarsinnaassagaluarpoq.

9.2.2 Naalackersuisut kingumoortumik atuutilersumik nuussinissanik akuersissutiginninnerat

Malittarisassatut pingaarnertut isigalugu kingumut atuutilersussanngorlugit nuussinissat akuersissutigineqartannginnissaat, taamaattoqartillugulu aningaasat atorneqareerneranni akuersissutiginnittoqartannginnissaa qulakkeerneqartassasoq Aningaasaqarnermut Ataatsimiititaliap Naalackersuisunut ukiut arlallit ingerlanneranni kaammattuutigisarpa. Taamaalillunilu missingersuutininik qaangiinissaq taama ersaritsigitillugu ukiumi aningaasanut inatsisip atuuffiata naalernerani nuussinerit ingerlanneqartariaqanngillat. Tassunga taarsiullugu missingersuutininik qaangiinermut pissutaasoq nunatta karsiata naatsorsuutaanut atatillugu naatsorsuutininut nassuiaatini ersarissarneqartariaqarpoq.

Ingerlatsinermut kontonit assigiinngitsunit kontomut pingaarnermut *20.30.01-imut, Aningaasaqarnermut Sulisoqarnermullu Aqutsisoqarfimmi allaffissornermut tunngasumut*, katillugit 5.369.000 kr.-it nuunneqarnissaat Naalackersuisut ulloq 29. januar 2010-mi akuersissutigaat. Missingersuutininut ilanngussani paasissutissat naapertorlugit nuussinerit 1. januar aamma 1. juni 2009-mit sunniuteqarput.

Nuussinerup januar 2010-mi, tassalu aningaasanut inatsisip ukiuata 2009-p naanerata *kingorna*, akuerineqarlunilu ingerlanneqarnera suliamik imaannaannginnerulersitsivoq. Taamaalillunilu nuussinissap ingerlannissaanut 2009-mi aningaasanut inatsimmi piginnaatitsissut qaangiutereersimavoq. Taama nipilimmik 2010-mi aningaasanut inatsimmi piginnaatitsissuteqartopoq, piginnaatitsissulli taanna ukiumut aningaasanut inatsisip atuuffianut 2010-mut taamaallaat atuuppoq. Nuussineq oqaasertaliussakkut tunngavissinneqanngitsoq inerniliunneqarsinnaagaluartoq immaqa *oqartoqarsinnaavoq* 2009-mi aningaasanut inatsimmi piginnaatitsissut taanna piffissamut naatsorsuutininik inaarsaaffiusumut (1. januar 2010-mit 2009-mut naatsorsuutininut inississugassat naammassineqarnissaasa tungaannut piffissamut) aamma atuuttariaqartoq, piffissamimi tassani naatsorsuutitigut nussuinissamut Naalackersuisut piginnaatitaareermata. Taamaattumillu nuussinerit inatsisitigut *tunngavissaqarsimannngitsut* qularnaatumik oqaatigissallugu tunngavissatut pigineqartut tunngavigalugit aalajangerneqarsinnaagunangilaq, taamaakkaluartorli oqaatigisariaqarpoq qanorluunniit pisoqaraluarpat taama kingusitsigisukkut nuussinerit ingerlanneqartariaqanngilluinnarmata! Ukiup aningaasanut inatsisip atuuffiata qaangiutereernerani taamatut nuussinissanik Naalackersuisut siunissami akuersissutiginneqqissanngitsut Aningaasaqarnermut Ataatsimiititaliamit naatsorsuutigineqarpoq.

Tamanna tunngavigalugu kaammattuut aallarniutigalugu taaneqartoq Aningaasaqarnermut Ataatsimiititaliamit uteqqinneqassaaq. Tamatuma saniatigut kontot pingaarnertit erseqqilluinnartumik qaangiiffiusussat nunatta karsiata naatsorsuutaasa kusassarneqarnissaat

siunertariinnarlugu aningaasaliissutinik ukiup naalernerani nuussiffigineqartannginnissaannik Naalakkersuisut ataatsimiititaliamit **kaammattorneqarput**. Missingersuusiordermut inatsit naapertorlugu aningaasaliissutinik qaangiinissap (taamaalillunilu inatsimmik unioqqutitsinissap) pinngitsoortinniarnissaanut Naalakkersuisut pisussaaffeqarnerat, taamaalillutillu aningaasaliissutinik atuivallaarnissaq pinngitsoorniarlugu oqaasertaliussani nuussinissamut piginnaatitsissutinik Naalakkersuisut atuinissaat ataatsimiititaliamit soorunami akuersaarneqarpoq. Ukiulli naalernerani taama nuussinerit immikkoortortani aningaasaqarnermik aqutsinerup nunatta karsiata naatsorsuutaani eqqortumik takutinneqanngitsoorneranut peqataaqataasinnaapput, taamaaliornikkullu aningaasaqarneq piffissaagallartillugu iliuseqarfigineqanngitsoorluni. Tamatuma saniatigut naatsorsuutinik taama kusasaanerup nassatarisarpaa nunatta karsiata aningaasaataanik ukiumut aggersumut aningaasanut inatsisissamut Inatsisartut missingersuusiorderisa pingaarnersiullutillu tulleriarinerisa pisariunerulerneru. Taamaattumik pisuni taamaattuni aningaasaliissutinik nuussinnaatitaanerminnik Naalakkersuisut atuinaveersaartariaqartut tassungalu taarsiullugu nuussinissaq pillugu qinnuteqaammik Aningaasaqarnermut Ataatsimiititaliamut saaqqummiussisariaqartut Aningaasaqarnermut Ataatsimiititaliaq isumaqarpoq.

9.2.3 Oqaasertaliussani piginnaatitsissummik unioqqutitsineq

Kontomit pingaarnermut 30.17.03-mit, Peqqissaanermut Ilinniarfimmu tunngasumit, kontonut matuma kinguliiniittunut aningaasanik nuussinissaq Naalakkersuisut ulloq 22. oktober 2009-mi akuersissutigaa:

- Konto pingarneq 32.11.02, Ineriartorneq suliassallu
- Konto pingarneq 40.91.08, Inuussutissarsiutinik ilinniartitaanerit ataani ilinniarfiit
- Konto pingarneq 40.12.24, Ilimmarfik

Kontomut pingaarnermut 30.17.03-mut missingersuutinut ilanngussami allassimavoq nuussineq arlalinnik siunertaqartoq. Oqaatigineqartut malillugit siunertat ilagaat taamani Naalakkersuisuusut suliassaqaarfinnik allanngortiterinerisa 1. november 2008-mi naammassineqarnissaa, tamatumalu nassatarisaanik PI Peqqissutsimut Naalakkersuisoqarfimmit Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfimmut nuunneqarpoq. Piffissamut aalajangiiffiusumut sanilliullugu nuussineq kingusissupilussuakkut ingerlanneqarpoq, tamannalu namminerim naapertuutinngilaq.

Tamatuma saniatigut maluginiarnarpoq 2009-mi aningaasanut inatsimmi sulisunut agguataarinernullu kisitsisit arlallit kukkusut periarfissaq iluatsillugu Naalakkersuisunit iluarsineqarnerat allassimammat. Aammattaaq suliassaqaarfimmi pingaarnersiuinernik allanngortiterinissaq toqqarneqarsimavoq, tassa sundhedsmedhjælperit sundhedsassistentinngornissaannut tapertaasumik ilinniartinneqarnerisa ingerlaannarnissaa siunertaralugu aningaasaliissutit atugassiissutigineqartut iluini piffissaq tamaat atorfiit tallimat nutaat pilersinneqarmata.

Oqaasertaliussaq taamatut nuussinermut tunngavissiisutut oqaatigineqartoq ima oqaasertaqarpoq:

”Suliassaqaarfiit allanngornerisa malitsigisaanik kontot pingaarnertit akornanni aningaasaliissutinik oqaasertaliussanillu nuussinnaanermut Naalakkersuisut piginnaatinneqarput.”

Oqaasertaliussamut nassuiaat ima oqaasertaqarpoq:

”Naalakkersuisut suliassaqarfiit allanngornerinut atatillugu oqaasertaliussat malillugit aningaasaliissutinik pineqartunik suliassat agguataarneqarnerisa allannguutaat malillugit nuussisinnaasarnissamik periarfissinneqarput”.

Suliamili matumani aningaasaliissutinik nuussinermi oqaasertaliussakkut piginnaatitsissutigineqartoq aalajangersimasoq ersarilluinnartumik qaangerneqarpoq. Taamaalillunilu ersarilluinnarpoq naalakkersuisoqarfiit akornanni suliassat allanngornerisa nassatarisaanik suliassaqarfinnik allannguneq tunngavigalugu aningaasaliissutinik nuussinissaannaq nuussinermi kisimi siunertarineqarsimanngitsoq. Taamaattumillu suliaq Aningaasaqarnermut Ataatsimiititaliamut akuerisassanngorlugu qularutissaanngilluinnartumik saqqummiunneqartussaagalarpoq.

Pisut imaannaannginnerannut erseqqissaataavoq Peqqinnissaqarfiup Aningaasaqarnermut Ataatsimiititaliaq aqutugalugu 2009-mi arlaleriarluni aningaasaliiffigineqaqqinnera. Atorfinnik amerlanerusunik pilersitsinissaq siunertaralugu aningaasanik pingaarnersiuiinermik allanngortitsineq nuussinermi matumani pineqartumi ingerlanneqartoq ilisimaneqarsimagaluarpat suliami tassani sulianiluunniit taakkunani arlalinni tamanna ataatsimiititaliap isummerneranut sunniuteqarluarsimasinnaagalarpoq.

Taamaaliornermikkut ataatsimut isigalugu oqaatigineqartariaqarpoq Naalakkersuisut oqartussaaffik Aningaasaqarnermut Ataatsimiititaliap pigisaa tigusimagaat kiisalu kukkusumik naliliisimallutik, tamannalu ataatsimut isigalugu isornartoqartutut oqaatigineqartariaqarluni.

9.3 Naalakkersuisut aningaasaliissutinik nuussinermani inatsisitigut tunngavissat

Inatsisitigut tunngavissaatit naapertorlugit Naalakkersuisut nuussineri pisimanersut Aningaasaqarnermut Ataatsimiititaliamit erseqqinnerusumik naliliiffigineqarsimavoq. Immikkoortoq 9.2.2.-mi aamma 9.2.3.-mi allassimasut eqqaassanngikkaanni ataatsimut isigalugu pissutsinik tamatumunnga naapertuutinnngitsunik ataatsimiititaliaq nalaataqarsimanngilaq.

10. Aningaasaqarnermut Ataatsimiititaliap inatsisissatut siunnersuummut oqaatigiumasai allat

10.1 Nalinginnaasumik oqaaseqaatit

Aallaqqaasiutigalugu isumaliutissiisummi immikkoortoq 5 innersuussutigineqarpoq, tassani suliat amerlassusiat, qinnuteqaatinik Aningaasaqarnermut Ataatsimiititaliap suliarinninnerata inerneru naapertorlugit agguataakkamik nalunaarsorneqarsimallutik.

Tamatuma saniatigut ilanngussaq A innersuussutigineqassaaq, tassani Aningaasaqarnermut Ataatsimiititaliap ukiumi qaangiuttumi aalajangigai tamakkerlutik suliap normukkaarlugit ilangunneqarsimapput. Aalajangiinerni arlalinni annertunerusumik paasissutisseqqullugit missingersuutinulluunniit ilanngussamik nutaamik nassiusseqqullugit Naalakkersuisut ataatsimiititaliamit qinnuigineqarsimapput. Taakkuttaaq pisariaqartillugu aalajangiinernut ataasiakkaanut kingullinngorlugit ilanngunneqarput.

Nuussinissat Naalakkersuisut namminneq akuersissutigisaat immikkoortup siuliani Aningaasaqarnermut Ataatsimiititaliamit sammineqarput. Ajoraluartumik oqaatigineqassaaq

kukkunerit naapertuutinningsullu arlallit missingersuutitut ilanngussani Naalakkersuisunit akuersissutigineqartuni nassaassaasut missingersuutitut ilanngussani Aningaasaqarnermut Ataatsimiititaliamit akuersissutigineqartuni aamma nassaassaammata. Tassunga atatillugu oqaatigineqassaaq aningaasaliissutinik allannguinnissat aalajangersimasut ataatsimiititaliamit akuersissutigineqarneraangata imaanngimmat missingersuutitut ilanngussat ilassutitut aningaasaliissutinut inatsimmi ilanngunneqartussatut Aningaasaqarnermut Ataatsimiititaliamit akuerineqartut.

Taamaalillunilu ilaatigut ilusiligaanermikkut inissitsiterneqarnermikkullu assigiissarneqarnissaasa kiisalu aningaasaliissutinut tunngasut nassuiarneqarnerisa pitsaasuunissaasa qulakkeerneqarnissaat siunertaralugu missingersuutitut ilanngussat ilassutitut aningaasaliissutinut inatsimmi ilanngunneqannginneranni Naalakkersuisunit misissorneqartarnissaat Aningaasaqarnermut Ataatsimiititaliamit nalinginnaasumik naatsorsuutigineqarpoq. Inatsisissatut siunnersuutip Naalakkersuisuneersup pitsaasuunera sukumiisumik misissorneqarsimassasoq naatsorsuutigineqartariaqarpoq.

Suliami paasissutissat amigarpallaarnerat pissutigalugu Naalakkersuisut qinnuteqaataannik suliarinninnini Aningaasaqarnermut Ataatsimiititaliap pisut ilaanni kinguartittarsimavaa. Naalakkersuisut isummernissaannut tunngavissianik assigisaannilluunniit atortoqarani atuarneqarsinnaaqqullugit missingersuutitut ilanngussat tamakkiisuunissaat Naalakkersuisunut eqqaasitsissutigissallugu ataatsimiititaliap pisariaqarsoraa.

10.1.1 Sillimaffiginnissinnaasimannginnissamik piumasaqaat

Ataatsimut isigalugu ukiumi qaangiuttumi aningaasaliissuteqarnissamik suliassat tunngavigalugit missingersuusiornermut inatsimmi § 28, imm. 2-p ataqqineqarnissaata erseqqissarneqarnissaa pisariaqarsorinarpoq. Aalajangersakkakut aalajangersarneqarpoq nutaanik aningaasaliissuteqartoqarnissaanik aningaasaliissutinilluunniit allanngortitsisoqarnissaanik qinnuteqaatit taamaallaat aningaasaqarnikkut iliuusissanut *pingaarutilinnut* aammalu aningaasanut inatsisissap suliarinerani *sillimaffigereerneqarsinnaasimanngitsunut* tunngasuusassat.

Nassuerutigineqartariaqarporli 2009-mi aningaasaliissuteqarnissamik suliassanut arlalinnut tunngatillugu aalajangersagaq taaneqartoq pisariaqarneratut tamakkiisumik malinniarneqarsimanersoq nalorninarmat.

Taamaalillutillu Naalakkersuisut suliaq 09-409-mi nunaqarfimmut aqutsisunut ulloq 28. april 2009-mi qinersinermut atatillugu partiit qineqqusaarnissaannut aningaasanik tapiissutissanik qinnuteqarput. Nunaqarfinnut aqutsisunut qinersinissaq siumut sillimaffigineqarsinnaasimanngitsutut oqaatigineqarsinnanngimmat, allaallumi 2009-mut aningaasanut inatsisissatut siunnersuummik ataatsimiititaliap suliarinninnermini qinersinissaq taanna pillugu Naalakkersuisut eqqaasimmagit Naalakkersuisut suliamik isumaginninnerat ataatsimiititaliamit naammaginangilluinnartutut isigineqarpoq.

Assersuutissaq alla tassaavoq suliaq 09-414, tassani namminersorneq pillugu inatsisip akuersissutigineqarnerata kingorna naalagaaffiup Nunaoil A/S-imi aktiaataasa pisarinissaannut aningaasanik Naalakkersuisut juni 2009-mi qinnuteqarput. Aktianik taakkuninnga pisinissaq namminersorneq pillugu inatsimmut nalinginnaasumik nassuiaatini immikkoortoq 5.3.5.3-mi piumasaqaataavoq. Tamanna tunngavigalugu aktiat taakku pisarinissaannut aningaasanik tamatumalu nassatarisaanik ukiumoortumik aningaasartuutissanik 2009-mi aningaasanut inatsimmi

sillimmatinik immikkoortitsisoqarsimasariaqaraluartoq Aningaasaqarnermut Ataatsimiititaliaq isumaqarpoq.

10.2 Inatsisissatut siunnersuummi kukkunerit amigaatillu aalajangersimasut

10.2.1 Ilanngussaq 1 aamma nalinginnaasumik nassuiaatit

Kukkuneq ataaseq taannarpiaq ilassutitut aningaasaliissutitut inatsisissatut siunnersuutit nassuiaatitaaniittoq 2005-imi, 2006-imi, 2007-imi aammalu 2008-mi Aningaasaqarnermut Ataatsimiititaliap isumaliutissiisummini uparuarpa. Kukkuneq maanna iluarsineqarpoq.

10.2.2 Ilanngussaq 2, 2009-imut oqaasertaliussanut allannguutit

Nuussineq Naalakkersuisunit Aningaasaqarnermulluunniit Ataatsimiititaliamit akuersissutigineqarsimanersoq kontoni pingaarni ataasiakkaani nalunaarneqartarmat aallarniutigalugu oqaatigineqassaaq. Pisumi matuma kingornaniittumi siullermi Naalakkersuisut ulloq akuersissutiginniffiat qulequttami nalunaarneqarsimavoq. Pisumi kingullermi Aningaasaqarnermut Ataatsimiititaliap suliamut normorititaa nalunaarneqarsimavoq.

Suliassa qarfirmut 70.01.97-imut, Avatangiisit naliliiffigineqarnerannut tunngasumut (aluminium) (09-428)

Oqaasertaliussap taassuma ilanngunneqarnissaanik Aningaasaqarnermut Ataatsimiititaliap ulloq 24. september 2009-mi akuerinninnerani oqaasertaliussaq kontomut pingaarnermut 75.01.13-imut attuumatinneqarpoq. Kontomulli pingaarnermut 75.01.13-imut missingersuutitut ilanngussami allassimavoq konto pingarneq ulloq 13. august 2009-mili suliassa qarfirmut 80-89-imut oqaasertaliussaq nr. 1-imi inatsisitigut tunngavissiisut aqutigalugu kontomut pingaarnermut matumani pineqartumut 70.01.97-imut nuunneqartoq. Tamanna allanneqarsimasariaqaraluarpoq.

10.2.3 Missingersuutitut ilanngussat

Nuussineq Naalakkersuisunit Aningaasaqarnermulluunniit Ataatsimiititaliamit akuersissutigineqarsimanersoq kontoni pingaarni ataasiakkaani nalunaarneqartarmat aallarniutigalugu oqaatigineqassaaq. Pisumi matuma kingornaniittumi siullermi Naalakkersuisut ulloq akuersissutiginniffiat qulequttami nalunaarneqarsimavoq. Pisumi kingullermi Aningaasaqarnermut Ataatsimiititaliap suliamut normorititaa nalunaarneqarsimavoq.

Konto pingarneq 10.13.12 Royal Greenland A/S – imut akisussaaffittalimmik taarsigassarsiat (09-418)

Aningaasaqarnermut Ataatsimiititaliamut inassuteqaatini konto pingarneq una kukkusumik 20.13.12-innogrlugu normulerneqarsimavoq. Inatsisissatut siunnersuummi konto pingarneq allassimasoq eqqortuuvoq.

Konto pingarneq 20.11.50 Ingerlatsinermut sillimmatit (09-416)

Aningaasaliissutinik allannguneq ulloq 29. juni 2009-mi Aningaasaqarnermut Ataatsimiititaliamit akuerineqartoq kukkusumik allassimavoq. Akuersineq pivoq ulloq 28. juni 2009.

Konto pingarneq 20.11.72 Nunaqarfinni illoqarfinnilu arlaqartunut immikkut ittunik aningaasaliissutissat (09-417)

Aningaasaliissutinik allannguneq ulloq 29. juni 2009-mi Aningaasaqarnermut Ataatsimiititaliamit akuerineqartoq kukkusumik allassimavoq. Akuersineq pivoq ulloq 28. juni 2009.

Konto pingaarneq 32.10.05 Dronning Ingridip Napparsimmavissua (09-422)

Aningaasaliissutinik allannguneq ulloq 22. juli 2009-mi Aningaasaqarnermut Ataatsimiititaliamit akuerineqartoq kukkusumik allassimavoq. Akuersineq pivoq ulloq 20. juli 2009.

Konto pingaarneq 32.11.04 Najukkani peqqinnissaqarfiit, nakorsanit sullinneqarneq (09-422)

Aningaasaliissutinik allannguneq ulloq 22. juli 2009-mi Aningaasaqarnermut Ataatsimiititaliamit akuerineqartoq kukkusumik allassimavoq. Akuersineq pivoq ulloq 20. juli 2009.

Siunertamut konto 70.01 Ataatsimut aningaasartuutit (13-08-2009)

Suliassaqrarfiup matumani pineqartup ataani missingersuutitut ilanngussat sisamaasut ilaanni pingasuni ulloq 13. august 2009-mi aningaasaliissutinik nuussinermut inatsisitigut tunngavit tamakkiisuunngitsoq allanneqarsimavoq. Suliassaqrarfimmut 10-89-imut oqaasertaliussaq nr. 1 innersuussutigineqartussaagunavippoq.

Suliassamut konto 73 Attaveqarneq angallannerlu (13-08-2009)

Suliassaqrarfiup 73-ip ataani missingersuutitut ilanngussani qulingilingiluaasuni tamani aningaasaliissutinik nuussinermut inatsisitigut tunngavit tamakkiisuunngitsoq allanneqarsimavoq. Suliassaqrarfimmut 10-89-imut oqaasertaliussaq nr. 1 innersuussutigineqartussaagunavippoq.

10.3 Aningaasaliissuteqarnissamik suliassanut ataasiakkaanut oqaaseqaatit

10.3.1 Kontomut pingarnermut 24.01.01-imut, Akileraartarnermut Aqutsisoqarfimmi allaffissornermut tunngasumut, ilassutitut aningaasaliissutit (09-402)

Sulisitsisunit akileraarutit A-t unerartitat akilersinniartarnerannik annertuumik ajornartorsiuteqarnerarneq tunngavigalugu Akileraartarnermut Aqutsisoqarfimmut aningaasaliissuteqaqqinnissaq Aningaasaqarnermut Ataatsimiititaliap suliami matumani februar 2009-mi akueraa. Sulisitsisut nakkutigineerunnerat pissutigalugu akileraarutitut A-nut kinguaattoorutit 325-350 mio. kr. –inik amerlassuseqalersimasut ilaatigut ataatsimiititaliamut paasissutissiissutigineqarpoq. Aalajangiinnermini Aningaasaqarnermut Ataatsimiititaliap ilaatigut ima allappoq:

*”Aningaasaqarnikkut taama ajorluinnartumik inissisimanerup aqqiivigineqarnissaanut suliniutinik **piaarnerpaarpaamik** aallartitsisoqarnissaa Aningaasaqarnermut Ataatsimiititaliamit **sakkortuumik kaammattuutigineqassaaq**. Suliap ingerlanera pillugu **ingerlaavartumik** ilisimatinneqartarnissani ataatsimiititaliap naatsorsuutigaa. Tassunga ilanngullugu akileraarutitut A-nut akiliutitut qanoq annertutigisut annaasatut isumakkeerneqartarnerisut pillugu ilisimatinneqarnissani ataatsimiititaliap kissaatigaa.”*

Tamatuma kingorna piffissami suliaq taanna tusagassiorffinnit assut sammineqarpoq, taamaakkaluartorli suliami ineriartorneq pillugu ataatsimiititaliap ilisimatinneqarnissaa Naalakkersuisut suna pissutiginerlugu pisariaqartutut isigisimangilaat. Aningaasaqarnermut Ataatsimiititaliamik kaammattorneqarluni Akileraartarnermut Akitsuusiisarnermullu Ataatsimiititaliap suliaq malersormagu Inatsisartut ilisimatinneqarnissaat taamaalilluni qulakkeerneqarpoq. Naalakkersuisulli Aningaasaqarnermut Ataatsimiititaliamut ilisimatitsinnginnerat naammaginartutut oqaatigineqarsinnaangilaq.

10.3.2 Puisit amiinik tunisinerup matusinerup ilaannakuusumik tamakkiisumilluunniit taamaatinneqarnera (09-412)

Ulloq 2. juni 2009-mi Inatsisartunut qinersisoqarnissaa ulloq 17. april 2009-mi nalunaarutigineqarpoq.

Inatsisartunut qinersinissamik nalunaaruteqarnerup kingorna piffissami aningaasaliissuteqarnissamik qinnuteqaatit, inuiaqatigiit unittuunnginnissaannut imaluunniit pisortat namminersortulluunniit annaasaqarnissaasa pinnngitsoortinneqarnissaannut pisariaqartut, kisimik Aningaasaqarnermut Ataatsimiititaliamit suliarineqarsinnaapput. Taamaakkaluartoq puisit amiinik tunisinerup ammaqinneqarnissaa siunertaralugu puisit amiinik tunisinerup tapiissutinut aningaasaliissutit 3,627 mio. kr.-inik amerlineqarnissaat Naalakkersuisut 2009-mi majip qitequnnerani qinnutigaat. Puisit mamaarnerannik pissuteqartumik taamaalinerani tunisineq matoqqatinneqarpoq.

Suliamik suliarinninneq inatsisitigut qularnaatsumik tungaveqarluni pinsinnaanersoq erseqqissumik aalajangerneqarsinnaanngimmat aningaasaliissuteqarnissamik qinnuteqaatip taassuma suliarineqarnissaa Aningaasaqarnermut Ataatsimiititaliami amerlanerussuteqartunit itigartinneqarpoq. Piffissami Inatsisartunut qinersinissap nalunaarutigineqarneranit qinersinerup tungaanut Naalakkersuisut taamatullu Inatsisartut sulianik ingerlatsisinnaaneranni killiliissutit pisortanik ingerlatsinerup maleruagassani nassuiaatigineqartut suliami naliliinermi amerlanerussuteqartut immikkut pingaaruteqartippaat. Taamatut killiliinernut pingaartumik tungaviusoq tassaavoq Inatsisartunut qinersinissaq nalunaarutigineqareersoq Naalakkersuisuusut qinersisartunik pissarsiniarlutik nunatta karsiata aningaasaataanik atuinissamut periarfissaqartinneqannginnissaat.

10.3.3 Efterkoliugallartumik Kangerlussuarmi pilersitsineq (09-416)

Ukiumi atuarfiusumi 2009/2010-mi efterskoliugallartumik Kangerlussuarmi pilersitsinissamut aningaasaliinissaq Aningaasaqarnermut Ataatsimiititaliamit suliami matumani juni 2009-mi akuerineqarpoq. Suliamik pilersaarusiormut Naalakkersuisut qaammatit arfinillit sinnerlugit atorsimammatigit aalajangiinermi Aningaasaqarnermut Ataatsimiititaliap isornartoqartippaa. Taamatuttaaq suliaasaqarfimmi piffissamut ungasissumut pilersaarusiormanninnerup uparuarnissaa ataatsimiititaliamit pissutissaqartinneqarpoq.

Kiisalu efterskoliugallartup atuartitsinissamut pilersaarutai il.il. inatsimmi piumasaaqatigineqartunut eqquutsitsinersut qularutigineqartoq Aningaasaqarnermut Naalakkersuisoqarfimmit oqaatigineqarsimasooq ataatsimiititaliamit maluginiarneqarpoq. Apeqqut taanna Aningaasaqarnermut Ataatsimiititaliamit iserfigineqanngilaq, tassa ataatsimiititaliamit naatsorsuutigilluinnarneqarmat apeqqut taanna inatsisileriffimmit qulaajarneqassasoq. Taamaattumillu aningaasaliissutinut allannguutissatut qinnutigineqartunik Aningaasaqarnermut Ataatsimiititaliap akuersissutiginninnera meeqqat atuarfiat pillugu inatsimmi aalajangersakkanik inatsimilluunniit allamik saneqqutsinissamik isummerfiginnertut akuersissutiginnertulluunniit isigineqarsinnaanngilaq.

10.3.4 Akileraartarnek Atugarissaarnerlu pillugit Isumalioqatigiissitaq (09-440)

Akileraartarnek Atugarissaarnerlu pillugit Isumalioqatigiissitap sulinerata 2009-mi aallartinnissaanut aningaasaliinissaq Aningaasaqarnermut Ataatsimiititaliamit suliami matumani november 2009-mi akuerineqarpoq.

Aalajangiinnermini ataatsimiititaliaq ilaatigut ima allappoq:

”Akileraartarnej Atugarissaarnissarl pillugit Isumalioqatigiissitami sulinerup pilersaarutit malillugit ingerlanneqarnissaa Aningaasaqarnermut Ataatsimiititaliamit pingaartinneqarpoq. Taamaattumik isumalioqatigiissitap sulinerata ingerlanera pillugu akulikitsumik ilisimatinneqartarnissani ataatsimiititaliap qinnutigissavaa.”

Sulineq pillugu ilisimatitsissut – aalajangiinnerup kingorna qaammatit arfinilerluinnaat qanngiunnerani – ataatsimiititaliamit sulitiguneqanngilaq, taassumali paaartumik tiguneqarnissaa naatsorsuutigineqarluni.

10.3.5 Nuummi GU-p allilernerqarnissaanut imm. 2-mut aamma 3-mut aningaasat atugassanngortinneqarnissaat (09-443 aamma 09-446)

Nuummi GU-p allilernerqarnissaanut missingersuutip B-p naammassineqarnissaanut 1 mio. kr.-it atugassiissutigineqarnissaat Aningaasaqarnermut Ataatsimiititaliamit ulloq 19. november 2009-mi akuersissutigineqarpoq. Missingersuutaagallartoq C tunngavigalugu sanaartornerup aallartinneqarnissaanut 17,5 mio. kr.-it Naalakkersuisunit qinnutigineqarsimapput, missingersuutaagallartorli taanna tamakkiisuusutut ataatsimiititaliamit isigineqanngilaq. Taamaallunilu missingersuutip B-p naammassineqarnissaanut aningaasanik taamaallaat atugassanngortitsisoqarsinnaalluni. Aningaasat Sanaartornermut Iluarsaanermullu Aningaasaateqarfimmi atornerqaratik uningaannartussat nalunngikkaluarlugu Naalakkersuisut qinnuteqarnerat ataatsimiititaliap taamani uparuarpa.

Sanaartugassat pilersaarummut missingersuummik B-mik tunngaveqartumut aningaasaliissuteqarnissamik qinnuteqaat nutaaq 2009-mi decemberip aallartinnerani Naalakkersuisut nassiuppaat. Qinnuteqaammi nutaami ilaatigut takuneqarsinnaavoq ataatsimiititaliap 19. novemberimi aalajangiinissaa *sioqqulluguli* missingersuut B naammassereersimasoq. Tamanna ataatsimiititaliamit uparuarneqarpoq, tamatumalu saniatigut apeqqutinik itisilerutaasunik arlalinnik apeqquteqarluni. Ataatsimiititaliaq ilaatigut aperivoq:

”Suliassamut tassunga aningaasat atugassat Naalakkersuisut sooq piviusorsiorfik missingersuusiorsimangilaat? Tassunga ilanngullugu 2010-mi ukiunilu missingersuusiorsiorfikuni ataasiakkaani tamani suliassamut aningaasaliissutit qanoq atornerqarnissaat sanaartornermut ilisimasalimmit naatsorsuutigineqarnerisooq paasissutissiissutigeqquneqarpoq. Paatsoortoqaqqunagu erseqqissaatigineqassaaq aningaasaliissutit aningaasaliissutinillu atuneq imaannimmata assigiittut, taamaattumillu sanaartugassanut aningaasaliissutinut agguanneqanngitsunut aningaasat qanoq amerlatigisut aningaasanut inatsimmi suliassamut immikkoortinneqarsimanerannik paasitinneqannarissaq ataatsimiititaliamit kissaatigineqanngilaq.”

Takussutissiaq matuma kingulianiittoq Naalakkersuisut akissutitut nassiuppaat:

”Immikkoortumut pilersaarut/aningaasaliissutissat kissaatit malillugit aningaasalersuinissaq:

| | 2008 | 2009 | 2010 | 2011 | 2012 | |
|---|------|------|------|------|------|--------------------|
| <i>Immikkoortumut pilersaarut</i> | | 7 | 17,5 | 5,5 | 24.2 | 20 mio. kr. = 74,2 |
| <i>mio. kr.</i> | | | | | | |
| <i>Atugassat naatsorsuutigineqartut</i> | | 1,2 | 3 | 18 | 30 | 22 mio. kr. = 74,2 |
| <i>mio. kr.</i> | | | | | | |
| <i>.”</i> | | | | | | |

Takussutissiaq siulianiittoq ima paasineqassaaq 2008-mi pilersaarummut 7 mio. kr.-it qinnutigineqarsimasut, Naalakkersuisulli 1,2 mio.-iinnarnik atuisimallutik. 2009-mi 17,5 mio. kr.-it

qinnutigineqarput, Naalakkersuisulli ilimagalugu 3 mio. kr.-it kisimik atorneqarnissaat. Aamma taamaappoq 2010-2012-imut. Allatut oqaatigalugu pilersaarutip ukiuani siullerni marlunni katillugit 24,5 mio. kr.-it qinnutigineqarsimapput, naak pilersaarummut atugassat 4,2 mio. kr.-innaasussatut naatsorsuutigineqartut. Taamaattumillu nikingassutit 20,3 mio. kr.-iusut Sanaartornermut Iluarsaanermullu Aningaasaateqarfimmi atorneqaratik uninngaannartussatut ilineqarsimapput.

Taamaalillunilu sanaartugassanut aningaasaliissutinik atuinissap piviusorsioortumik piaaraluni missingersuusiorneqartannginneranut (pisumilu matumani pineqartumi aningaasanut inatsit aamma eqqarsaatigalugu) suliaq taanna ersarilluinnartumik assersuutissaavoq. Taamaaliornikkut nunatta karsiata aningaasaatai tigorianaanaat Sanaartornermut Iluarsaanermullu Aningaasaateqarfimmut pituttorneqartarput, taamaalillunilu aamma Inatsisartut aningaasanut inatsisit ukiuini ataasiakkaani aningaasanik tulleriiarillutik pingaarnersiuinissaat killilerneqartarluni. Taama pisoqartarpoq sanaartugassanut aningaasaliissutinik atuinissap piviusorsioortumik missingersuusiorneqartarnissaa Aningaasaqarnermut Ataatsimiititaliap naak arlaleriaqaluni kaammattuutigisaraluaraa. Taamaattumillu kaammattuut taanna Aningaasaqarnermut Ataatsimiititaliap ukioq manna aammaarluni uteqqissavaa.

10.3.6 Narsarsuarmi mittarfimmik iluarsaassineq (09-449)

Narsarsuarmi mittarfimmik iluarsaanermik suliniummut ilassutitut aningaasaliissuteqarnissaaq Aningaasaqarnermut Ataatsimiititaliap ulloq 16. december 2009-mi suliaraa.

Ukioq taamaalereersoq sanaartugassanut aningaasaliissutinik qinnuteqarneq ataatsimiititaliamit uparuarneqarpoq, tassa aningaasat Sanaartugassanut Iluarsagassanullu Aningaasaateqarfimmi atorneqaratik uninngaannartussanngorlugit qularnanngitsumik ilineqassammata. Sanaartugassanut aningaasaliissutit atorneqarnissaasa piviusorsioortumik missingersuusiortarnissaaq Aningaasaqarnermut Ataatsimiititaliap *arlaleriaqaluni* kaammattuutigisaraluarpaa.

Tamatuma saniatigut aalajangiinermi ataatsimiititaliaq ilaatigut ima allappoq:

”Qinnuteqaatip aningaasaqarnikkut kingunerisassai 2010-mi aningaasanut inatsimmut ilanngunneqassasut missingersuutinut ilanngussami allassimammatt kukkuneruvoq. Taama allassimasoqarnissaa pisariaqarunnaarpoq, tassami 2010-mut aningaasanut inatsit qangarsuarli akuerineqareerpoq. Taamaattumillu 2009-mi ilassutitut aningaasaliissutinut inatsimmi ilanngunneqartinnani missingersuutinut ilanngussami taama allassimasoq peerneqassaaq.”

Tamatuma kingorna piumasaaqatit aalajangiinermi allassimasut atugassaattillugit qinnuteqaat ataatsimiititaliamit akuerineqarpoq.

Taamaattumillu aningaasatigut kingunerisassat 2010-mi aningaasanut inatsimmut ilanngunneqarumaarnerat missingersuutinut ilanngussami *suli* allassimammatt paasiuminaalluinnartutut oqaatigisariaqarpoq.

Aningaasaliissutinik allanngiueq aalajangersimasumik piumasaaqatitaqartillugu Aningaasaqarnermut Ataatsimiititaliamit akuerineqarpat tamatumalu kingorna piumasaaqatit taakku Naalakkersuisunit malinneqanngippata tunngaviusumik isigalugu akuersineq atorunnaassaaq. Pisumi matumani – suliaq annertuutut oqaatigineqarsinnaannginnera pissutigalugu – piumasaaqatinik malinninnginnerup allaffissornikkut naammattumik peqqissaarussinnginnermik takussutissatut isiginissaa ataatsimiititaliap toqqarpaa, tamatumalu uteqqinneqannginnissaa Naalakkersuisunit qulakkeerneqassasoq naatsorsuutigineqarpoq.

10.3.7 Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfimmut (KIIIN) ilassutitut aningaasaliissuteqarnissamik qinnuteqaat (09-451)

Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfiup iluani aningaasaliissutinik nuussinerit arlallit suliami matumani Aningaasaqarnermut Ataatsimiititaliamit december 2009-mi akuerineqarput. Ataatsimut isigalugu nuussinerit taakku IST-ip 2009-mi inernera 537.000 kr.-inik *pitsanngoriartippaat*, tamannalu pitsaalluinnartutut ataatsimiititaliamit isigineqarpoq. Tamanna ataatsimiititaliamit ilaatigut ima oqaatigineqarpoq:

”... Aningaasaliissuteqarnissamik qinnuteqaatip matuma IST-p inernera 2009-mi 537.000 kr.-inik pitsanngoriaateqartissammagu naggasiullugu oqaatigineqassaaq. Taamaalluni Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfiup aningaasaliissutit tamakkerlugit atornissaat pisariaqartissimangilaq. Tamanna naammaginarluinnartutut Naalakkersuisoqarfinnullu allatut maligassiunerit Aningaasaqarnermut Ataatsimiititaliap isigaa, tassa ukiup naanerani aningaasaliissutit (minnerpaamik) tamakkerlugit atornissaat siunertaralugu pisuni taamaattuni Naalakkersuisoqarfiit atuiniapallattarnerat nalinginnaasuummat.

Aningaasaliissuteqarnissamik qinnuteqaammut matumunnga atatillugu Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisumit ilisimatitsissut Aningaasaqarnermut Ataatsimiititaliap suliaraa (Suliaq nr. 01.31.29-00179). Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfimmit (KIIIN) Naalakkersuisoqarfiup aqutsisoqarfianut (KIIIA) aningaasanik Naalakkersuisunit akuerineqartumik nussineq ilisimatitsissummi taaneqartumi Naalakkersuisoqarfiup nassuiaateqarfigaa. KIIIA-mi sulisut tupinnaannartumik ilarpasui pisortatut atorfeqartut ilisimatitsissummi allassimavoq. Immikkoortortat assigiinngitsut aammalu naalakkersuisoqarfiup pisortanik atorfeqartitaqareersut ataatsimoortinneqarnerisigut KIIIA-p pilersinneqarsimanagera tamatumunnga pissutaasoq isummernissamut tunngavissiami allassimavoq. Pisortat atorfiit taakku ilaat akissaateqarfinnut appasinnerusunut allanngortinneqarsinnaanersoq misissorneqassasoq Aningaasaqarnermut Ataatsimiititaliap qinnutigaa. Taamaallunilu sulisunik naammattumik amerlassuseqartunik tunuliaqutissaqarani pisortatut atorfiit attatiinnarneqarnissaat illersorneqarsinnaangilaq. Suliasaqarfiup taassuma iluani pisortat amerlanerat Naalakkersuisoqarfiup ammasumik nassuerutigimmagu ataatsimiititaliamit iluarisimaarneqarpoq, tassa 2010-mi aningaasanut inatsisissatut siunnersuummi ataatsimiititaliap suliaqarneranut atatillugu apeqqu taannarpiaq Aningaasaqarnermut Ataatsimiititaliap uparuarmagu. Aningaasanut inatsisissatut siunnersuummut atatillugu Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisup suliasaqarfiani allaffissornikkut annertunerusumik sipaaruteqartoqarnissaa ataatsimiititaliap siunnersuutigaa. Tamanna Inatsisartut akuersissutigaat. Pisortatut atorfiit taaneqartut allanngortinneqarnissaat allaffissornikkut sipaarutissat taakku ilaattut ingerlanneqarnissaat naleqquttutut ataatsimiititaliamit isigineqarpoq. Taamaattumillu periarfissamik tamatumunnga Naalakkersuisoqarfik toqqaannangikkaluamik nammineq atorluaalersaarmat ataatsimiititaliamit assorsuaq iluarisimaarneqarpoq.”

Naalakkersuisoqarfiup suliasaqarfiani allaffissornikkut aningaasaliissutinik ikililerinissat 2010-mi aningaasanut inatsimmi ilanngunneqartut naatsorsuutigisatut atugassanngortinneqartussanngorneranni apeqqu siuliani issuaavigineqartoq pisariaqartinneqarnera malillugu ataatsimiititaliamit uterfigeqqinneqarumaarpoq.

11. Aningaasaqarnermut Ataatsimiititaliap kaammattuutai

2009-mi ilassutitut aningaasaliissutinut inatsisissatut siunnersuummik kiisalu Naalakkersuisut aningaasaliissutinut allannguutissatut siunnersuutaannik suliarinninnermini taakkunangalu malitseqartitsisarnermit misilittakkani tunngavigalugit Naalakkersuisunut **kaammattuutinik**

aralinnik ukuningga saqqummiussinissaminut Aningaasaqarnermut Ataatsimiititaliaq pissutissaqarsorivoq:

Kaammattuut nr. 1

Kingumut atuutilersussanngorlugit nuussinissat malittarisassatut pingaarnertut isigalugu akuersissutigineqartannginnissaannik Aningaasaqarnermut Naalakkersuisoq Aningaasaqarnermut Ataatsimiititaliamit **kaammattorneqarpoq**. Aningaasaliissutinik allannguissamik akuersissuteqartoqassatillugu aningaasat atorneqareerneranni akuersissuteqannginnissaq pinerit tamaasa qulakkeerqartariaqarpoq.

Kaammattuut nr. 2

Missingersuutinik qaangiinissaq pinngitsoorneqarsinnaanngitsoq erseqqitsillugu nunatta karsiata naatsorsuutaasa kusassarneqarnissaat siunertariinnarlugu ukiumi aningaasanut inatsisit atuuffiata naalernerani nuussinerit ingerlanneqartannginnissaannik Naalakkersuisut Aningaasaqarnermut Ataatsimiititaliamit **kaammattorneqarput**. Taamaattoqartillugu aningaasaliissutinik nuussinnaatitaanerminnik Naalakkersuisut atuinngitsoorluarsinnaapput, tassungalu taarsiullugu nuussinissamik qinnuteqaammik Aningaasaqarnermut Ataatsimiititaliamut saqqummiussillutik. Tassunga taarsiullugu missingersuutinik qaangiinermut pissutaasoq nunatta karsiata naatsorsuutaanut atatillugu naatsorsuutitut nassuiaatini ersarissarneqarsinnaavoq.

Kaammattuut nr. 3

Aningaasat Sanaartugassanut Iluarsagassanullu Aningaasaateqarfimmi atorneqaratik uninngaannartussaasut ilisimagaluarlugu aningaasanik qinnuteqartoqartaqqunagu sanaartugassanut aningaasaliissutinik atuinissamik **piviusorsioortumik** missingersuusiortarnissamik qulakkeerinninniarnerminnik Naalakkersuisut ingerlatsiinnarnissaat Aningaasaqarnermut Ataatsimiititaliamit **kaammattuutigineqarpoq**.

Kaammattuut nr. 4

Illassutitut aningaasaliissutitut inatsimmi *missingersuutitut ilanngussat* aningaasaliissutinik allanngortitsinermut tunuliaqutaasumik nassuiaatitut ilassutitut aningaasaliissummi kisimik uppersartaatitut ilanngunneqartarmata, missingersuutitut ilanngussat tamatuma kingorna Inatsisartunit innuttaasunillu, Naalakkersuisut isummernissaannut tunngavissianik ikorfartorneqaratik, atuarneqarlutillu paasineqarsinnaasuunissaat Aningaasaqarnermut Ataatsimiititaliamit assut pingaartinneqarpoq. Naalakkersuisut missingersuusiortnermut malittarisassiaanni allassimasut ulluinnarni malinneqartartuuppata missingersuutitut ilanngussat naammaginartuusimassagunaraluarput, taamaattumik missingersuusiortnermut malittarisassami aalajangersakkanik malinninnissamik Naalakkersuisut Aningaasaqarnermut Ataatsimiititaliamit **kaammattorneqassapput**.

12. Aningaasaqarnermut Ataatsimiititaliap inassuteqaatai

Paasinnineq isumaliutissiissummi allaqqasoq naapertorlugi inatsisissatut siunnersuut akuersissutigineqassasoq Aningaasaqarnermut Ataatsimiititaliap isumaqatigiittup inassutigaa.

Taama oqaaseqarluni Inatsisartut Aningaasaqarnermut Ataatsimiititaliaata Inatsisartut 2009-mi ilassutitut aningaasaliissutitut inatsisissaattut siunnersuut aappasaaniigassanngortippaa.

Niels Thomsen

Naaja Nathanielsen,
siulittaasoq

Finn Karlsen

Per Berthelsen

Aqqaluaq Egede